

# Simo elaa ya Yesu Klisto eya imolaka Yoane Maphoo ma etatele

O nte ya Masimo maso Maalaa mane, eyaka Yoane yakyese ne na boikye na eyaka Matie, Malako na Luka. Yakokana na maaka bee nde na simo ya minyoko ma Yesu (Yoane 18-19), na na ndambo ya maphoo maayoko.

## **Mokanda jwa Yoane moli na bitee binene bibale:**

Yoane 1-12: Imbele sa Yesu sabokokakye (kyeka o 2.4)

- Yoane 1.1-18: Maloba ma etatele. Yesu ali loba sa Nwaphongo saabutwa moto; yo ayelela bato moo na bomo
- Yoane 1.19-51: Yesu atati imomola na bato be, Yoane Mobatise, Andele, Petelo, Filipe, na Natanaele
- Yoane 2.1-12.36: Etoma ya Yesu. Yesu avani na bato ndengye na ndengye, emba akyela na bilekyesako sambo: Bolonga pha Kana; mwana wa mokonzi, etuku; Yesu azeye bato nkoto itano; atambusi o ikolo sa maa; abikye moto owa pholo miyo, akundosi Lazalo
- Yoane 12.37-50: Yesu aweni obokye bato bale imoanola

Yoane 13-21: Waakoka «Imbele sa Yesu»

Yoane 13-16: Mateya ma Yesu ma suka

Yoane 17: Ibondesi sa Yesu siinene

Yoane 18-21: Minyoko na ikundwa sa Yesu.

Yesu amiweninye oka baekosi sambo

Yoane akomaka Simo Elaa «pho bεε oanole obokye Yesu ali Masiya Nwana wa Nwaphongo. Bo bεε oanosi bomoo, yo amokyela obokye ozwe bomoo phaa bobele» (20.30-31).

### *Etatele*

<sup>1</sup> O etatele Iloba abaka,  
Iloba abaka oka Nwaphongo, Iloba abaka  
Nwaphongo.

<sup>2</sup> O etatele abaka oka Nwaphongo.

<sup>3</sup> Mbolo iso yakyelama nde ne,  
bo sεε phe ekpele yonoyo nde teyakyelama.

<sup>4</sup> Iso yaakyelama ne ili na bomoo, emba bomoo  
phabaka moo nwa bato.

<sup>5</sup> Moo muungyengye onte ya enzombi,  
emba enzombi teikiy koka imozimya.

<sup>6</sup> Yabaka moto monomo, owatomaka  
Nwaphongo: Nkombo ye yabaka Yoane.

<sup>7</sup> Iyo aesi iya ba nzoka, pho awole moo, pho ya  
obokye bato baso baanole pho ye.

<sup>8</sup> Iyo mampenza taikaka ba moo, kasi ayakaka ya  
wo nde pho ya moo.

<sup>9</sup> Iloba abaka nde nwaakolo munyεε nwaya o  
mokyisi, nwaangyengyεε moto munsu.

<sup>10</sup> Abaka o mokyisi,  
mokyisi nwakyelama nde ne,  
kasi mokyisi tenwaika moeba.

<sup>11</sup> Aesi o mokyisi nwe mampenza,  
kasi bato bεε tebaikiy moyamba.

- 12 Kasi oka baamoyambi, baanosi na nkombonye, abaphethe bokonzi pha ibutwa bana ba Nwaphongo.
- 13 Bée tebaika botama na malongo, na ná phowa ya nzoto, na ná phowa ya moto, kasi na Nwaphongo.
- 14 Iloba amibuye moto ambi ya zala onte ya banga emba toweni nkyemo ye. Nkyemo me eli obokye, Nwana nde monomo, owatonda na ngolu na ná phele yauta na Tata.
- 15 Yoane aahwanaka, amba imola pho ye yokye: «Kyeka owa woko nga obokye: O sima ya nga, kyeye moto monomo ookondekye, pho abaka o boo pha nga.»
- 16 Pho nde ne owa iso, banga baso tozwa ngolu o ikolo sa ngolu.
- 17 Bo Mobeke hwanambyamaka o mafoko ma Mose, ngolu na phele yaya na Yesu Klisto.
- 18 Moto monomo taikawene Nwaphongo; kasi Nwana nde yo monomo ooli Nwaphongo, yo ooli onte ya Tata, aloteya yo.

### *Yoane aimosi pho ya Yesu*

19 Kyeka munoko hwa Yoane imbele saba yo o Yelusaleme, waamotomela Bayuda banganga ba Nwaphongo na balewi pho ya imotuna motuna obokye: «We oli nza?» 20 Taika zita, amba wo yokye: «Nga sili Klisto.» 21 Emba bamba motuna bekye: «We oli nza? Oli Eliya?» Amba buya yokye: «Nga sili Eliya». «Oli Moimosi?» Amba buya yokye: «Phe». 22 Emba bamba wo

ne bεkye: «We ombi ba nza? Pho tokye imola balotomakyi! Kowɔ bo pho ya we mampenza?»  
<sup>23</sup> Amba ya wɔ yokye: «Nali ηwesi ηwa moto okoanwane o obokye obokye: “Bongya nzela ya Nkolo!”» Bo wawɔ moimosi Izaya. <sup>24</sup> Nzuka bato batomaka bεε babaka Bafalisayi. <sup>25</sup> Bamba kula nde motuna bεkye: «Bo tobee Klisto, naa Eliya, naa Moimosi, pho ya'ye kobatisa?» <sup>26</sup> Yoane amba babuyisa yokye: «Nga, nabatisa na maa. Onte ya bεε, moto monomɔ ali, bεε toomoefe. <sup>27</sup> Kaye o sima ya nga, sikokyi na iyingola simbi ya bikoto bε.» <sup>28</sup> Maphɔɔ masɔ mamana malekanaka o Betani o mokukulu moyɔkɔ ηwa Yaladenε, waabaka Yoane kabatisa.

### *Yesu, Nwana wa mpate wa Nwaphongo*

<sup>29</sup> Bo yana, aesi ya wene Yesu kaye bili yo, amba wɔ yokye: «Kyeka Nwana wa mpate wa Nwaphongo okomanya masumu ma bato. <sup>30</sup> Eli nde pho ye nawɔkɔ obokye: “O sima ya nga moto ookoye kandekye, pho abaka o boo pha nga.” <sup>31</sup> Nga mampenza, simoefe, kasi nde pho ya imiweninya sεε oka Isalayεε, yango mena naesi iyabatisa na maa.» <sup>32</sup> Yoane amba wɔ yokye: «Nawenekye Bolɔbɔ boute o ikolo ndokolo inkotonwenya, boesi yakye tεmε o ikolo sεε. <sup>33</sup> Emba nga siikaka nweba, kasi owantoma ibatisa na maa, eli yo o wa wɔ na nga obokye: “Owa mowene we Bolɔbɔ boute bokye tεmε o ikolo sε, eli yo o wa mobatisa na Bolɔbɔ Bosantu.” <sup>34</sup> Emba nga, nambo wene, na wɔ ngakye, iyo ali Nwana wa Nwaphongo.»

*Baekosi ba Yesu baa boo*

<sup>35</sup> Bo yana, Yoane akulaka ba o elele me, yo na baekosi bée babale. <sup>36</sup> Waawene yo Yesu katambule, amba wo yokye: «Kyeka Nwana wa mpate wa Nwaphongo!» <sup>37</sup> Wamooka baekosi babale kawo babona, bamba benga Yesu. <sup>38</sup> Yesu amba ya miekpinya, waawene yo obokye bamobengye, amba wo na bée yokye: «Bée kolukye'ye?» Bamba buya dekya: «Labi — kyelukye iwō bokye Moteye —, kobe bi?» <sup>39</sup> Amba wo na bée yokye: «Yaka wamowene.» Emba bamba ya kyende, bamba ya kye wene elele ekye be yo, emba bamba ya zala ne mokolo me. Yabaka phenephe ngonga ya iko.

<sup>40</sup> Andele, nwana nyango na Simo Petelo, abaka monomō na babale baokaka Yoane na babengaka Yesu. <sup>41</sup> O boo pha bato baso, amba kye zwa nwana nyango Simo, amba wo ne yokye: «Toweni Masiya.» — Kyelukye iwō bokye Klisto. <sup>42</sup> Amba yakye ne oka Yesu. Wamolembetela yo, Yesu yokye: «Oli Simo, nwana wa Yoane, bamoefanga Sefasi.» — Kyelukye iwō bokye «Petelo».

<sup>43</sup> Bo yana, Yesu aesi kyende o Galileya. Amba yakye zwa Filipe amba wo ne yokye: «Imbengye!» <sup>44</sup> Filipe abaka moto wa Betesaida, mokyisi nwa Andele na Petelo. <sup>45</sup> Filipe amba yakye vana na Natanayele, amba wo ne yokye: «Toweni owakoma bée mapho me o buku pha mibeko ma Mose na baimosi: Eli Yesu, nwana wa Zozefu owa Nazarete.» <sup>46</sup> Natanayele amba wo yokye: «O Nazarete wakokyi itokolo lowo lolaa?» Filipe amba wo yokye: «Yaka ya kyekye.» <sup>47</sup> Yesu

amba ya kyeka Natanayele okoye bili yo, amba wo na bato baabaka ne pho ye yokye: «Kyeka owakolo moto wa Isalayele ootoli na bole». <sup>48</sup> Natanayele amba motuna yokye: «Konzebe bi?» Emba Yesu amba mobuyisa yokye: «Waaba Filipe saboebangakye, waaba we o se ya hwete hwa fige, naewenekye.» <sup>49</sup> Natanayele amba buya yokye: «Labi, oli Nwana wa Nwaphongo, oli mokonzi hwa Isalayele.» <sup>50</sup> Yesu amba mobuyisa yokye: «Oanosi nde pho nawo na we obokye naewenekye o se ya hwete hwa fige. Wamowene mapho maikye malekyi bonene ileka lolo.» <sup>51</sup> Emba amba kula wo yokye: «Phele phele nawo na be, wamowene ikolo siingo, emba banze ba Nwaphongo babaa baute o ikolo sa Nwana wa Moto.»

## 2

### *Eseleko ya bolonga o Kana*

<sup>1</sup> Mokolo hwa iyato, eseleko ya bolonga yabaka o Kana o manyete ma Galileya, emba nyango wa Yesu abaka omo. <sup>2</sup> Yesu na baekosi be bababangaka na be o eseleko me. <sup>3</sup> Waunva maleku, nyango wa Yesu amba wo ne yokye: «Tebakuli ba na maleku.» <sup>4</sup> Kasi Yesu amba ya mobuyisa yokye: «Mama, nga na we lowo iye? Imbele sa nga naino tesikokyi.» <sup>5</sup> Nyango amba ya wo na bato baetoma yokye: «Kyela iso yaamoewole yo.»

<sup>6</sup> Mambongo motoba, maakyela be na mabanga, maabaka Bayuda bakyelele pho ya imikunyola bo okowo mibeko ma be, mabaka

wamō. Mbongo yōnyo yōnyo kyenyolo balitele ηwambi naa iko.\* <sup>7</sup> Yesu amba ya wō na bato baetoma yokye: «Tonza mambongo mamana na maa». Emba bamba matonza nōnō o munoko. <sup>8</sup> Yesu amba ya wō na bēe yokye: «Uηwanwa eye, toka ndambo ya maa mē, okye maphe mokolo wa eseleko.» Bamba yakye mophe mango. <sup>9</sup> Emba waamameka yo, maa mabutoo maleku. Taikaka eba biute mango, yaebaka nde batokaka mana maa. Bobele mokolo eseleko amba wō na molongyi <sup>10</sup> yokye: «Moto munsō kataakaba maleku swaswa phanza, bo bato babangyi bēe balangyi, baambe ya ambya maleku ma mpiko. Kasi wē, obombi maleku ma swaswa tee nōnō uηwanwa eye!»

<sup>11</sup> Mena eli etatele sa bilekyesako ba Yesu o Kana o manyete ma Galileya. Ateyaka nkyemo ye, emba baekosi bēe bamba moanolela. <sup>12</sup> Sima ya yango, amba ya kyende o Kapalanauma, yo na nyango, na banaa nyango nana baekosi bē. Kasi bakelaka omō nde banaa nkolo.

### *Yesu o Tempelo*

<sup>13</sup> Eyenga ya Ilekana ya Bayuda yakomaka phenephe emba Yesu amba yakyende o Yelusaleme. <sup>14</sup> Amba yakye zwa o Tempelo baungye ba mangombe, ba mampate na mankoto nwinya na baendinye ba baphalanga bazasi omō. <sup>15</sup> Ndokolo, kambe ya kyela phimbo ya simbi, amba bauwinya bēe basō o Tempelo, ebe mampate na mangombe. Amba nyangola baphalanga ba baendinye, amba bungutinya

---

\* **2:6** 2.6 Litele: Ekyelele ya damuzani (ndangyi ya ba litele ikoo).

bamesa ba ɓe. <sup>16</sup> Amba ya wɔ na ɓaungye ɓa mankoto ŋwenya yokye: «Manya iso miina wawa emba sabuya ingambi sa Tata ingambi sa mumbongu.» <sup>17</sup> Baekosi ɓée ɓamba umunya obokye ɓakoma obokye: «Phowa ya ingambi sa we yamumboma.» <sup>18</sup> Kasi Bayuda ɓamba ya wɔ ne ɓekye: «Iyaa ye saaloteya we, ɓokokyele we ɓaɓona?» <sup>19</sup> Yesu amba ɓabuyisa yokye: «Uwola Tempelo eye emba nga namoetonga na nkolo iyato.» <sup>20</sup> Emba Bayuda ɓamba wɔ ne ɓekye: «Tempelo eye ekyesi mambula mako mane mbuka motoba ma ietonga. Emba iwe, wamokoka ikula etonga na nkolo iyato?»

<sup>21</sup> Kasi yo awoko nde na nzoto ye ili Tempelo. <sup>22</sup> Yango mena, waakundwa Yesu onte ya ɓawe, ɓaekosi ɓamba ya umunya obokye awoko ɓaɓona, emba ɓamba anolela buku pha Nwaphongo na maphoo maawoko yo.

### *Ianola site sikokyi*

<sup>23</sup> Waataa ɓaa Yesu o Yelusaleme, imbele sa eseleko ya Ilekana, ɓato ɓaikye ɓaanola nkombo ye wa wene ɓée bilekyesako ɓa ɓa yo kakyele. <sup>24</sup> Kasi Yesu, yo, taikaka ɓaanolela pho aɓaɓaka ɓée ɓaso, <sup>25</sup> emba taikaka sengyela obokye ɓamoimole maphoo maakyekyi moto, pho yo mampenza aɓaka iili o ndondo ya moto.

## 3

### *Isolo sa Yesu na Nikodeme*

<sup>1</sup> Yabaka onte ya Bafalisayi moto monomo na nkombo Nikodeme, monomo na bankumu ɓa Bayuda. <sup>2</sup> Waa mokolo, amba ya kyende



oka Yesu, amba wɔ nɛ yokye: «Labi, ɓanga toebe obokye oli moteye owatoma Nwaphongo. Phɔ na moto takokyi ikyela bilekyesako bikyele wɛ ɓo Nwaphongo tali nɛ.» <sup>3</sup> Yesu amba mobuyisa yokye: «Naewɔlɛ nde phɛlɛ phɛlɛ ngakye: ʼBo moto takuli ɓotama mbala eya ɪɓale, takokyi iwɛnɛ Bokonzi pha Nwaphongo.» <sup>4</sup> Nikodemɛ amba wɔ nɛ yokye: «Bo moto aunva koma phomba, amokula ɓotama ndengye'ye? Akokyi ikula nyɔɔ o ibu sa nyango emba ambe ɓotama?» <sup>5</sup> Yesu amba mobuyisa yokye: «Nawɔ na wɛ nde phɛlɛ phɛlɛ ngakye: ʼBo moto tabotami na maa na ná Bolɔɓɔ, takokyi inyɔɔ o Bokonzi pha Nwaphongo. <sup>6</sup> Oo ɓotami na ɓomoto, ali moto, oo ɓotami na Bolɔɓɔ ali ɓolɔɓɔ. <sup>7</sup> Sakamwa ɓo nawɔkyi na wɛ obokye: “Osengyesi ɪɓotama o ikolo.” <sup>8</sup> Ewɛɛɛ kyekyende mbale ezingyi yango, emba koeyokye, kasi toebe biute yango na bikye yango. Eli nde ɓomɔ phɔ ya moto oo ɓotami na Bolɔɓɔ.» <sup>9</sup> ʼBɔɓɛɛ Nikodemɛ amba ya wɔ nɛ yokye: «Lowɔ mɛ laamba kyelama ndengye'ye?» <sup>10</sup> Yesu amba mobuyisa yokye: «Iwɛ oli moteye o Isalayɛɛ, emba toombe eɓa maphɔɔ mama? <sup>11</sup> Naewɔlɛ nde phɛlɛ phɛlɛ: Towɔ maphɔɔ maeɓe ɓanga, toimole maphɔɔ maawɛnɛ ɓanga, emba ɓɛɛ toanole ikyimole ɓanga. <sup>12</sup> Bo toanole wa ewɔlɛ nga maphɔɔ ma mokyisi, wamba anola ndengye'ye ɓo naewsɔsi maphɔɔ ma ikolo? <sup>13</sup> Phɔ moto nɔnɔ mɔnɔmɔ taika baa o ikolo ɓo teebe nde Nwana wa Moto owauta o ikolo. <sup>14</sup> Nde ɓo watombaka Mose nzɔɔ o bokye, esengyesi obokye Nwana wa Moto atombame <sup>15</sup> phɔ moto munsɔ okoanole, azwe na

nzela ye bomoo pha bobele.

<sup>16</sup> Pho Nwaphongo azinga mokyisi na boikye, yango mena ambya Nwana we, nde yo monomoo, pho ya obokye moto munsoo okoanole Nwana me, yo sa waa, kasi azwe bomoo pha bobele.

<sup>17</sup> Pho Nwaphongo taika toma Nwana we o mokyisi pho ya iya sambisa mokyisi, kasi pho ya obokye mokyisi mobikye pho ye. <sup>18</sup> Moto okomoanole, taikiy sambisama. Moto otoanole, ambosambisama, pho takyi anola nkombo ya Nwana nde monomoo wa Nwaphongo. <sup>19</sup> Emba isambisa me sango sisi: Moo moesi o mokyisi, kasi bato bazingyi enzombi o elele ya moo pho bitoma ba bee babaka bibe. <sup>20</sup> Pho moto munsoo okokyele maphoo maabe kaine moo, emba tatokolo o moo, pho bitoma bee sawenene. <sup>21</sup> Moto ookokyele maphoo malaa katokolo o moo pho bitoma bee biwenene, bitoma me bakyelama onte ya Nwaphongo.»

### *Yoane na Yesu*

<sup>22</sup> Sima me, Yesu na baekosi bee baesi ya kyende o Yuda. Akyelaka na bee omoo banaa nkolo, abaka kabatisa. <sup>23</sup> Yoane ne, abaka kabatisa o Ainona, phenephe na Salima ooli maa maikye. Bato babaka bayabatisama. <sup>24</sup> Pho Yoane naino tebataaka munyose o boloko.

<sup>25</sup> Baekosi ba Yoane bamba ya ika ziko bee na Moyuda monomoo pho ya lowoo la imikunyola bowoo mibeko ma be. <sup>26</sup> Bamba ya kyende oka Yoane, bamba ya kye woo ne bekye: «Labi, moto owabaka na we o mokukulu moyoko nwa Yaladene, owa woko we pho ye, kyeka ne abuto

ibatisa emba bato baso babuto bakuyende nde oka ye!» <sup>27</sup> Yoane amba babuyisa yokye: «Moto takokyi imiphe ekpele koleka eya mophe bée o ikolo. <sup>28</sup> Bée mampenza oli manzoka ma nga obokye nawoko ngakye: “Nga sili Masiya, kasi nali moto owa toma bée o boo phe.” <sup>29</sup> Moto oli na nwanwasi ali moloo. Kasi ekamba ya moloo, ootemi wamo, kamokye emba nwesi nwa moloo momophe nkyisa. Nde boli nkyisa ya nga nzikye. <sup>30</sup> Esengyesi obokye ngambo ye ebaa, emba eyaaka nga eute.»

### *Okoute o ikolo*

<sup>31</sup> «Okoute o ikolo ali o ikolo sa iso. Oouti o mokyisi ali wa mokyisi emba kawo ya mokyisi. Okoute o ikolo <sup>32</sup> kaimole yaa wene yo na yaa oka yo, emba na moto taanole ikiyimole yo. <sup>33</sup> Moto okoanole ikiyimole yo, kaanole obokye Nwaphongo ali phele. <sup>34</sup> Pho owatoma Nwaphongo kawo maloba ma Nwaphongo, ooko mophe Bolobo bote boli na ndelo. <sup>35</sup> Tata kazingye Nwana emba iso aiyambya o maboko me. <sup>36</sup> Moto okoanole Nwana ali na bomoo pha bobele; moto otokumole Nwana etawene bomoo, kasi yoo ya Nwaphongo eli mi yo.»

## 4

### *Yesu na nwanwasi mosamaliya*

<sup>1</sup> Waeba Yesu obokye Bafalisayi baoka obokye yo kazwe baekosi baikye kambe na batisa bato baikye koleka Yoane, <sup>2</sup> — o bosembo, Yesu yo mampenza taikaka baa kabatisa, kasi ya batisaka nde baekosi bée — <sup>3</sup> amba ya mana o

Yuda aesi ya butwa o Galileya. <sup>4</sup> Pho ya ibutwa omō, asengyelaka ikatisa Samaliya.

<sup>5</sup> Amba ya koma o mokyisi mōnōmō nwa Samaliya moobangye βέε Sukala, phenephe na manyete maphēkye Yakobo nwana we Zozefu, <sup>6</sup> elele me eyabaka iziba sa Yakobo. Na bophembekye pha itambula, Yesu aesi ya kye zala imbale ya mungombe nwa iziba. Yabaka phenephe na bunya i moto.

<sup>7</sup> Ikyeka bobo, nwanwasi mōnōmō wa Samaliya aesi ya toka maa. Yesu amba ya wō ne yokye: «Impe maa ma inywa.» <sup>8</sup> Baekosi βέε bakyekye o omokyisi munene pho ya ikye omba ntoma ya iza. <sup>9</sup> Kasi nwanwasi me, Mosamaliya mōna, amba ya wō na Yesu yokye: «Lotati bo? Iwe, Moyuda, konzongye nga nwanwasi mosamliya maa ma inywa!» Pho Bayuda tebaa benele iyangana ekpele yōnyō na Basamaliya. <sup>10</sup> Yesu amba ya mobuyisa yokye: «Bo oebakyi ikabo sa Nwaphongo na okoewole obokye: Impe maa ma inywa, ebakyi nde we moto wa imoonga, emba yo nde aephēkyi maa ma bomō.» <sup>11</sup> Nwanwasi amba wō ne yokye: «Nkolo, toli nana tubu, na iziba sili sizindo, mana maa ma bomō me wamazwa bi? <sup>12</sup> Iwe olekyi ango wa banga Yakobo owa loikyela iziba sisi, saa ikaka nywa yo maa, ebe na bana βέε, ebe na manyama me?»

### *Maa ma bomō*

<sup>13</sup> Yesu amba mobuyisa yokye: «Moto munso okonywe maa mama, amokula oka phowa ya maa. <sup>14</sup> Kasi moto owa munywa maa maamophe

nga, etakule oka phowa ya maa. Pho maa maamophe nga ma mobutwa ndokolo elele ekye tokolo maa onte ye nono o bomoo pha bobele.»

<sup>15</sup> Nwanwasi amba ya wo ne yokye: «Nkolo, impe maa me pho nga sakula oka phowa ya maa ma inywa, nga sambaka kula naya wawa pho ya iyatoka maa.»

<sup>16</sup> Yesu amba ya wo ne yokye: «Kye banga moloo nya we emba bee baso oye wawa.»

<sup>17</sup> Nwanwasi amba mobuyisa yokye: «Nga sili na moloo.» <sup>18</sup> Yesu amba wo ne yokye: «Kowo na bolaa obokye: Sili na moloo, waunva zala na balo batano, emba lele oli na we unwanwa eye tali molo wa we. Na bomoo, owoo phele.»

<sup>19</sup> Emba nwanwasi amba wo ne yokye: «Nkolo, nawene obokye oli moimosi. <sup>20</sup> Baango ba banga basambelaka Nwaphongo o ngomba eye. Emba bee kowo obokye elele ya isambela Nwaphongo eli nde o Yelusaleme.» <sup>21</sup> Yesu amba wo ne yokye: «Mama, inzanole, imbele samoya, etebakule sambela Tata na o ngomba eye, na o Yelusaleme.

<sup>22</sup> Kosambele itiyefe bee, kasi banga tosambele ikyiefe banga pho lobiko loute na Bayuda.

<sup>23</sup> Kasi imbele saamoya, sango sisi, saamosambela baakolo basambesi ba Tata, na molimo na na phele. Pho mena eli basambesi baalukye Tata. <sup>24</sup> Nwaphongo ali molimo. Yango mena bato baamosambele, basengyesi imosambela na molimo na na phele.» <sup>25</sup> Nwanwasi amba ya wo ne yokye: «Naefe obokye Masiya monomoo asengyesi iya, okobangye bee Klisto. Waamoya yo, aloimola maphoo masoo.»

<sup>26</sup> Yesu amba wo ne

yokye: «Masiya me, eli nga okoewole oyo.»

<sup>27</sup> Imbele me baekosi baesi ya koma. Bakamwaka na iwene obokye Yesu kasolole na nwanwasi. Kasi na moto taika motuna obokye: «Kolukye'ye?» Na obokye: «Pho ya'ye kosolole ne?» <sup>28</sup> Bobele, nwanwasi mona aikyi ika uuku ye, aesi ya kye imola bato o lombo obokye: <sup>29</sup> «Yaka yakye kyeka moto monom onvosi mapho maso maakyela nga. Etebe nde yo Klisto?» <sup>30</sup> Bato baesi ya tokolo o mokyisi, bamba yakye ooli yo.

### *Ntina ya etoma ya Yesu*

<sup>31</sup> Imbele me, baekosi babaka bamokandindisa bekye: «Labi, taa za.» <sup>32</sup> Kasi yo amba ya wo na beke yokye: «Nali na ntoma ya iza ite iebe beke.» <sup>33</sup> Baekosi bamba butwa iwono onte ya beke bekye: «Bobo moto monom animophe ntoma ya iza nde iye?» <sup>34</sup> Yesu amba ya wo na beke yokye: «Ntoma ya nga, eli ikyela bookozingye owantoma na ikokya etoma ye. <sup>35</sup> Beke mampenza towo obokye: "Iikasi makombe mane emba imbele sa inoko mbuma sikokye." Kasi nga nawo na beke ngakye: Tomba miyo okyeye, mbuma ili o manzabi iosi ikokyi pho ya inoko! <sup>36</sup> Munokyi ambo zwa iphuti se, kambe na bokya mbuma pho ya bomo pha bobele. Na bomo, moto okophikye na okonoko bakumbe elele yonyo. <sup>37</sup> Pho i lowo lolo ete eye eli nde phele: "Monom kaphikye, omoyoko kanoko." <sup>38</sup> Naetomaka ikye noko yaate yaikaka kumela beke. Baayoko bakuma, emba beke oesi ya zwa bolaa mi yaakumelaka bebi na boikye.»

<sup>39</sup> Basamaliya baikye ba mokyisi munene baanolaka Yesu pho maloba ma nwanwasi mawoko yo obokye: «Anvosi maphoo maso maakyela nga.» <sup>40</sup> Na wakoma bee phenephe ne, Basamaliya baongaka ne obokye ata baa na be. Emba amba kyela na bee nkolo ibale. <sup>41</sup> Bato basuu baikye bakulaka anola Yesu pho ya maphoo maawoko yo. <sup>42</sup> Emba bamba ya wo na nwanwasi mona, bekye: «Teli obokye tomoanosi nde pho ya maphoo maloimolakyi we, kasi na banga mampenza tomookyi, emba toebi obokye ali phele Mobikye wa mokyisi.»

*Yesu abikye nwana wa mokonzi monomwa wa baloo*

<sup>43</sup> Sima ya nkolo ibale, Yesu amba ya mana o bilele me, amba ya butwa o Galileya. <sup>44</sup> Pho yo mampenza aanolaka obokye moimosi tazwe ngambo o mokyisi mwe mampenza. <sup>45</sup> Kasi wakoma yo o Galileya, bato ba Galileya bamoyambaka na bolaa. Bakyendekye o Yelusaleme pho ya eseleko, na bee me, bawenekye iso yakyelaka Yesu.

<sup>46</sup> Yesu amba ya butwa o Kana, o manyete ma Galileya, owa bongolaka yo maa maleku. Mokonzi monomwa wa baloo abaka na nwana wa lele na bolosi o Kapalanauma. <sup>47</sup> Waaoka yo obokye Yesu auti o Yuda, akomi o Galileya, amba yakyende zwana ne, amba ya onga ne obokye bakyende pho akye bikya nwana we wa lele oli nde mowe. <sup>48</sup> Yesu amba wo ne yokye: «Bo bee toweni mayaa na bilekyesako bee otoanole!» <sup>49</sup> Mokonzi wa baloo amba wo ne yokye: «Nkolo,

yakye naino ηwana wa nga sabowakye!» <sup>50</sup> Yesu amba wo ne yokye: «Kyende, ηwana wa we ali na bomoo.» Moto mona amba ya anola maloba maa mowosi Yesu, nono wa butwa yo. <sup>51</sup> Waba yo kabutwe, bato bee baetoma bamba ya mobenga, bamba ya wo bekye: «Iwana wa we wa lele ali na bomoo!» <sup>52</sup> Amba ya batuna imbele ye sibutwaki ηwana na bolaa emba bamba mobuyisa bekye: «Yabaka yana, o ngonga ya sambo wa mana mowe we o nzoto ye.» <sup>53</sup> Ango wa ηwana awenekye obokye yabaka nde o sina imbele saawoko Yesu ne obokye: «Iwana wa we wa lele ali na bomoo.» Mina wa mo, yo na bonkpe phe bosoo baesi ya anola. <sup>54</sup> Mena yabaka elekyesako eya ifale eyakyelaka Yesu o Galilea, wauta yo o Yuda.

## 5

### *Yesu abikye moto owanyiba makolo o Yelusaleme*

<sup>1</sup> Sima ya maphoo mamana, waa imbele sa eseleko ya Bayuda, Yesu amba ya kyende o Yelusaleme. <sup>2</sup> Nzuka o Yelusaleme, phenephe na mozibo mootangye ηwa bampate, wali mbondo yonyo ekyebangye bee na munoko ηwa ba Ebele Betezata. Mokanda monomo ηwa milaku mitano ηwabaka wamo, <sup>3</sup> o milaku me, bato ba malosi baikye babaka bamilangye omo, bato baapholo miyo, baakpekusa, baanyiba binango. [Babaka baziya obokye maa maphukubane, <sup>4</sup> pho anzelu wa Nkolo abaka kaute o mbondo imbele siiyoko pho ya iphukubinya



maa. Moto wa bolosi owa kyekye mikumbya o maa me phanza waaphukubane mango, abikaka na bolosi phe, nabo bolosi me phabaka ndengye'ye.] <sup>5</sup> Moto monomō owanyiba enango mambula mako maato mbuka njwambi abaka omō. <sup>6</sup> Waamowene Yesu alangyi, na waeba yo obokye akōkyi na eleme mena, amba wō ne yokye: «Oli na phowa ya ibika?» <sup>7</sup> Mookaa amba mobuyisa yokye: «Nkolo, sili na moto wa inkumbya o mbondo imbele siphukubane maa. Imbele siikusubane nga obokye nakye mikumbya o maa, moto mosuu kaingyele angwa o boo pha nga.» <sup>8</sup> Yesu amba ya wō ne yokye: «Langwa, kpa itoko sa we, tambula.» <sup>9</sup> Mina wamō, moto me abikyi. Aesi yakpa itoko se, abuto itambula.

Nzuka mokolo me yabaka mokolo njwa sabata. <sup>10</sup> Pho ya bomō, Bayuda bamba ya wō na moto obikyi bekye: «Eli mokolo njwa sabata, tosenyesi iphila itoko sa we.» <sup>11</sup> Kasi amba babuyisa yokye: «Moto oombikye, eli nde yo moto owō na nga obokye: “Kpa itoko sa we otambule.”» <sup>12</sup> Bamba motuna bekye: «Moto me nza owō na we obokye: “Kpa itoko sa we otabule?”» <sup>13</sup> Kasi moto owabikyaka bee taikaka eba nza oomobikye, pho Yesu amanaka waali moluku njwa bato baabaka wamō.

<sup>14</sup> Sima, Yesu amba kula kye mozwa o Tempelo, amba wō ne yokye: «We mona obikyi, sakula kyela masumu pho lowo losuu lolobi bofe saeyelela» <sup>15</sup> Bobele, moto me amba kyende imola Bayuda obokye ebakyi Yesu moto oomobikye. <sup>16</sup> Tata wamō, Bayuda bamba ya okyela

Yesu yoo, pho akyelaka babona mokolo nwa sabata. <sup>17</sup> Kasi Yesu amba ya babuyisa yokye: «Tata, nongo unwanwa eye ali o ikyela etoma; na nga nde bomoo nali o ikyela etoma.»

<sup>18</sup> Tata wamoo, Bayuda bakulaka luka na boikye manzela ma imoboma, teli nde pho taikaka kumola mokolo nwa sabata, kasi na pho abaka kabangye Nwaphongo obokye ali Ango, kambe na kula mimekyinya na Nwaphongo.

### *Bokonzi pha Nwana wa Nwaphongo*

<sup>19</sup> Yesu amba kula ya kpa maloba amba bawole yokye: «Nawoo na bée nde phele phele, Nwana takoyi ikyela lowoo na ndengye'ye yo mampenza, kasi nde ikyi wene yo Ango kakyele: Pho iikiy kyele Tata, Nwana kaikyele nde bomoo. <sup>20</sup> Eli obokye Tata kazingye Nwana emba kamoteya iso iikiy kyele yo. Amoteya bitoma bikuli leka bonene, na obokye bée obe kokamwe nde bokamo. <sup>21</sup> Pho booko akole Tata bawe kakule babuya na bomoo, Nwana ne kabikya nzaa oozingyi yo. <sup>22</sup> Tata taasambisa moto, ambya isambisa siso oka Nwana, <sup>23</sup> obokye bato basoo bakumole Nwana bo okokumole bée Tata. Moto ootokumole Nwana, taakumole na Ango owa motoma.

<sup>24</sup> Nawoo na bée nde phele phele, moto okookye maloba ma nga, kambe na anolela owantoma, ali na bomoo pha bobele. Yo etasambe, kasi yo amokundwa onte ya bawe, amozwa bomoo. <sup>25</sup> Nawoo na bée phele phele, imbele siiye — emba unwanwa eye imbele me sili wawa — bawe bamooka nyesi nwa Nwana wa Nwaphongo

emba bato bamooka ηwesi me, bamoba na bomoo. <sup>26</sup> Pho, booli Tata na bomoo yo mampenza, nde bomoo apha Nwana obokye abe na bomoo me yo mampenza. <sup>27</sup> Amophe bokonzi pha isambisa pho ali Nwana wa Moto. <sup>28</sup> Maphoo maso mama mango saekamwisa! Imbele siiye, baso baakyimele o malita bamooka ηwesi nwe, <sup>29</sup> emba baso baakyelaka bolaa bamokundwa pho ya izwa bomoo. Baakyelaka bofe, bamokundwa pho ya isambisama.»

*Maphoo maweninya bokonzi pha Yesu*

<sup>30</sup> Nga, sikokyi ikyela lowo na ndengye ya nga mampenza: Natene bolombe nde na noko yookyi nga, emba bolombe pha nga boli pha bosembo pho siilukye ikyela boozingyi nga, kasi boozingyi owantoma.

<sup>31</sup> «Bo namiwole pho ya nga mampenza, bowokye pha nga nde tebofe phaa phele. <sup>32</sup> Eli nde mosuu okwo pho ya nga, emba naebe oboye iwo siiwo yo pho ya nga sili sa phele. <sup>33</sup> Bee, watomaka bato oka Yoane Mobatise. Aewole maphoo ma phele. <sup>34</sup> Ka nga, sisengyesi na moto obokye awo pho ya nga. Nawo babona pho ya bee, obokye obikye. <sup>35</sup> Yoane abaka tala ekyelosa bee emba kyelole: Kasi bee wazingaka ikumba nde pho ya ηwana imbele na saa ya tala me.

<sup>36</sup> Kasi nga, nali na maphoo ma iewole maalekyi maaka Yoane na bonene: Eli bitoma biantoma Tata obokye nabikyele. Nabikyele, emba eli bee biiwo pho ya nga obokye Tata antoma. <sup>37</sup> Tata owantoma awo na yo mampenza pho ya nga. Kasi toika oka ηwesi nwe na mbala,

naa iwene boo phe. <sup>38</sup> Emba iloba se tesili onte ya b̄e, pho b̄e toanolele owatoma yo.

<sup>39</sup> B̄e koekole Buku pha Nwaphongo pho koununya obokye wamozwa om̄o bom̄o pha bob̄e. Kasi eli nde phango boowo pho ya nga.

<sup>40</sup> Emba toozingye iya oka nga pho ya iya zwa bom̄o pha bob̄e.

<sup>41</sup> Nkyem̄o, siika izwa na bato. <sup>42</sup> Kasi naeyebe, b̄e toli na lozingo la Nwaphongo onte ya b̄e.

<sup>43</sup> Inga, naesi o nkombo ya Tata, emba b̄e toikiyi benela inzamba. Ka bo moto mosuu aesi na nkombo ye mampenza, yo m̄ona b̄e wamoy-amba!

<sup>44</sup> B̄e nde ombi anola ndengye'ye, b̄e bazwe nkyem̄o ya b̄e onte ya b̄e na b̄e. B̄e bate balukye nkyem̄o ikiyute na Nwaphongo yo mampenza?

<sup>45</sup> Saumunya obokye yamoba nga owamokye esongyela oka Tata. Mosongyesi wa b̄e, eli Mose okolemele b̄e. <sup>46</sup> Pho bokooanolele Mose, nde onzanolelakyi me, pho akomaka nde pho ya nga.

<sup>47</sup> Bo toanole yaakoma yo, wamba anola iikiyi wo nga ndengye'ye?»

## 6

### *Yesu azeye bampela nkoto itano*

<sup>1</sup> Sima me, Yesu amba yakatisa o mokukulu mooyoko nwa ebale eenene ya Galileya, ekyebangye na b̄e Tiberias. <sup>2</sup> Moluku nwa bato nwabaka momobengye pho bato bawenekye bilekyesako biabaka yo kakyele oka bato baa malosi. <sup>3</sup> Yango mena Yesu amba ya baa o ikolo sa ngomba akye zala om̄o yo na baekosi b̄e.

<sup>4</sup> Yabaka ηwana o boo pha eseleko ya Bayuda eya Ilekana. <sup>5</sup> Nzuka watomba Yesu miyo o ikolo bobo, amba ya wene moluku ηwa bato moye oli yo. Amba ya wo na Filipe yokye: «Tomoomba mapa pho ya obokye bato baba baze bi?» <sup>6</sup> Wa wo yo babona, amumekaka. Pho yo aebaka lowo laamokyela yo. <sup>7</sup> Filipe amba ya mobuyisa yokye: «Na bo toombi mapa ma baphalanga baakokyi na iphuti sa nkolo mikama mibale, etemaakokye obokye moto na moto azwe noko ηwana etee.» <sup>8</sup> Monomo na baekosi be, okobangye bee Andele, ηwana nyango na Simo Petelo, amba ya wo ne yokye: <sup>9</sup> «Munzenga monomo wawa, ali na mapa matano na swe ibale. Kasi ina yango miina yamokyela ekpele'ye pho ya boikye pha bato bobo?» <sup>10</sup> Yesu yokye: «Obazasa o se.» Elele me yabaka na nkata nzikye. Bobele, bamba ya zala. Babaka phenephe bampele nkoto itano. <sup>11</sup> Emba Yesu amba ya kpa mapa, apha Nwaphongo melezi emba amba ya makabela bato baso baabaka wamo. Amba kula kyela nde bomo na swe. Abaphekye nde na phowa ya moto na moto. <sup>12</sup> Waaoka bee ntoma, Yesu amba ya wo na baekosi bee yokye: «Angyinya bitee biso biikasi, pho ekpele yonyo sabunga.» <sup>13</sup> Bamba ya bianginya, bamba tonza banyanzima iko mbuka babale na bitee ba mapa maazaka be. <sup>14</sup> Waawene bato elekyesako eyauta yo ikyela, bekye: «Oyo ali owaakolo moimosi, oosengyesi iya o mokyisi.» <sup>15</sup> Kasi Yesu waebaka yo obokye bakokyi iya mokpa na bokusi pho ya imobuya

mokonzi, amba kula mana wamɔ, yo mampenza amba baa o ngomba.

*Yesu atambusi o ikolo sa maa*

<sup>16</sup> Wakoma nkɔkɔlɔ, baekosi bɛɛ bamba yauta nɔnɔ o ebale enene. <sup>17</sup> Bamba ya baa o vato bɔnɔbɔ baamba ya kye o Kapalanauma, o mokukulu moyɔkɔ. Mena bunya bombo inda, emba Yesu naino sataa babenga. <sup>18</sup> Ewɛɛɛ enene yeesi ya kyela, ebale ebuto iphukubana. <sup>19</sup> Balukaka phenephe na bakylometele batano naa motoba, waa wene bɛɛ Yesu katambule o ikolo sa maa, kambe koma phenephe na vato. Emba bɛɛ bailaka, <sup>20</sup> kasi Yesu amba wɔ na bɛɛ yokye: «Bɛɛ saila, eli nde nga!» <sup>21</sup> Bazingaka imokpesa o vato, kasi sa kɔkɔ, vato bokye sɛmɛ o elele eyakyekye bɛ.

*Yesu ali mapa ma bomɔɔ*

<sup>22</sup> Bo yana, moluku nwa bato nwa ikalaka o mokukulu moyɔkɔ, nwamba yaeba obokye yabaka wamɔ nde vato bɔnɔbɔ, na obokye Yesu taikaka kye na baekosi bɛɛ elele yɔnɔyɔ, bɛɛ bakyekye bɛɛ mampeza. <sup>23</sup> Kasi mato maayɔkɔ maautaka o Tiberias makomaka phenephe na elele eya zaka bɛɛ mapa sima ya Nkolo iphe mɛɛsi. <sup>24</sup> Waaeba moluku nwa bato obokye ebe Yesu, ebe baekosi bɛɛ tebakuli baa wamɔ, bato bamba ya kpela o mato emba bamba yakyende o Kapalanauma, ikye miluka Yesu. <sup>25</sup> Emba wamozwa bɛɛ o mɔpha moyɔkɔ nwa ebale enene, bamba wɔ ne bɛkye: «Labi, okomi wawa imbele iye?» <sup>26</sup> Yesu amba babuyisa yokye: «Naewole nde phele phele ngakye: Toondukye

pho ya obokye wawene bilekyesako, kasi pho wazaka mapa wambaka na maoka. <sup>27</sup> Osengyesi imiambya o etoma pho ya izwa ntoma ite iunve, yamoephe Nwana wa Moto, kasi pho ya ntoma ikiyitono phe. Pho eli Tata, yo ooli Nwaphongo, owa mophe bokonzi.» <sup>28</sup> Bobele bamba ya wo ne bekye: «Tosengyesi ikyela boo pho ya ikyela bitoma biizingye Nwaphongo obokye tobikyele?» <sup>29</sup> Yesu amba babuyisa yokye: «Etoma ya Nwaphongo eli nde ianolela owatoma yo.» <sup>30</sup> Bamba ya mobuyisa bekye: «Kasi we, elekyesako iye eyamokyela we pho toewene emba tombe eanolela? Etoma ya we iye? <sup>31</sup> O obokye, baango ba banga bazaka mana, nde bo wakoma bee obokye: “Abaphekye ya iza, mapa maute o ikolo.”» <sup>32</sup> Kasi Yesu amba wo na bee yokye: «Naewole nde phele phele, teli Mose owaephekye mapa ma ikolo, kasi eli nde Tata okoephe maakolo mapa ma ikolo. <sup>33</sup> Pho mapa ma Nwaphongo, eli nde yo okoute o ikolo na okoambya bomoo o mokyisi.»

<sup>34</sup> Emba bamba ya wo ne bekye: «Nkolo, olophekye nkolo iso mapa me.» <sup>35</sup> Yesu amba ya wo na bee yokye: «Eli nde nga oli ipa sa bomoo, moto okoye oka nga etakule oka nzala. Moto okonzanole etaokye phowa ya maa. <sup>36</sup> Kasi naambo wo ngakye: Beeweni emba toanole. <sup>37</sup> Bato baso baampe Tata, bamoya oka nga, emba okoye oka nga, esi movakye, <sup>38</sup> pho nauta o ikolo pho ya iyakyela bokozingye owantoma, kasi bokozingye nga phe. <sup>39</sup> Nzuka, phowa ya owantoma eli obokye nga sabungya

nɔnɔ moto mɔnɔmɔ mi baampe yo, kasi obokye nabakundole o mokɔlɔ nwa suka. <sup>40</sup> Phowa ya Tata yango eye: Moto munso oweni Nwana ambi na moanola, azwe bomɔɔ pha bobele. Emba nga, naamokundola o mokɔlɔ nwa suka.»

<sup>41</sup> Tata wamɔ, Bayuda babuto ingungubana ne phɔ awɔkɔ obokye: «Nali ipa siute o ikolo.»

<sup>42</sup> Emba bambaka kula wɔ bekye: «Teli yo Yesu, nwana wa Zozefu? Teloebe nyango na ango? Ndengye'ye akokyi iwɔ unwanwa eye obokye: “Nauta o ikolo?”» <sup>43</sup> Yesu amba kula ya babuyisa yokye: «Le ingungubana onte ya be! »

<sup>44</sup> Moto takokyi iya oka nga bo Tata owantoma tamokambi, emba nga naamokundola o mokɔlɔ nwa suka.» <sup>45</sup> Baimosi bakoma bekye: Bato basɔ bamoteyama na Nwaphongo. Moto munso owa oka yauta na Tata ambi na anola mateya me, kaye oka nga. <sup>46</sup> Eli obokye na moto taika wene Tata, bo teebe nde owauta na Nwaphongo. Iyo, awene Tata. <sup>47</sup> Naewole nde phele phele, moto okoanole ali na bomɔɔ pha bobele. <sup>48</sup> Nali ipa sa bomɔɔ. <sup>49</sup> O bokye, baango ba be bazaka mana, emba bawa. <sup>50</sup> Mapa maute o ikolo mali obokye moto owaamazaa, etaawe.

<sup>51</sup> «Nali ipa sa bomɔɔ siuti o ikolo. Moto owamoza ipa me amoba na bomɔɔ phɔ ya bobele. Emba ipa samoambya nga, eli nzoto ya nga, yambyami phɔ ya obokye mokyisi mozwe bomɔɔ.» <sup>52</sup> Yango mena, Bayuda bamba butwa iika ziiko na bokusi onte ya be, bekye: «Ndengye'ye moto mona akokyi ilophe nzoto ye obokye toize?» <sup>53</sup> Yesu amba ya wɔ na be yokye: «Naewole nde phele phele, bo toze nzoto



ya Nwana wa Moto, bo tombi na nywa malongo me, ootozwe bomoo. <sup>54</sup> Moto okoze nzoto ya nga, na okonywe malongo ma nga, ali na bomoo pha bobele. Emba nga, naamokundola o mokolo nwa suka. <sup>55</sup> Pho nzoto ya nga ili yaakolo ntoma, na malongo ma nga mali maakolo maleku. <sup>56</sup> Moto okoze nzoto ya nga, na okonywe malongo ma nga, ali onte ya nga, na nga nali onte ye. <sup>57</sup> Emba bo wantoma Tata ooli na bomoo na obokye nali na bomoo pho ye, yango mena moto owamoza nzoto ya nga, amoba na bomoo pho ya nga. <sup>58</sup> Ipa sauta o ikolo sili bobo: Sikyese na saazaka baango ba bese. Bese bawa, kasi moto owamoza ipa siwene bese sisi, amobaa na bomoo pho ya bobele.»

<sup>59</sup> Mena yabaka mateya ma Yesu o mangambi ma makyita ma Bayuda o Kapalanauma.

### *Maphoo maamba bomoo pha bobele*

<sup>60</sup> Sima ya imooka, baekosi bese baikye bamba butwa iwoo bekye: «Iloba sisi sili sikusi! Okokyi imooka nza?» <sup>61</sup> Kasi waeba yo mampenza obokye baekosi bese bagungubane pho ya iloba me, Yesu amba wo na bese yokye: «Iloba me siephe yo? <sup>62</sup> Emba bombi wene Nwana wa Moto kabaa o elele eyabaka yo phanza?... <sup>63</sup> Eli nde Bolobo okambya bomoo, nzoto tikyele ekpele. Maphoo maewosi nga, mali Molimo na bomoo. <sup>64</sup> Kasi wali baayoko onte ya bese, bate baanole.» Pho Yesu aebaka tata o etatele baabaka bawa bate baikaka anola na nza owa-muungya. <sup>65</sup> Amba kula wo yokye: «Yango

mena, nawokyi na b̄εε bokye: “Moto takokyi iya oka nga bo Tata tamoanolesi.”»

<sup>66</sup> Tata mokolo mamuna, baekosi b̄εε baikye bamanaka emba tebakulaka mobenga. <sup>67</sup> Emba Yesu amba ya w̄o na Iko mbuka babale yokye: «Na b̄εε, tozingye na b̄εε ikyende?» <sup>68</sup> Simo Peltelo amba ya mobuyisa yokye: «Nkolo, tomokula kyende oka nza? Iwe oli na maph̄o ma bom̄o pha bobele. <sup>69</sup> Na banga, toanosi emba toebi obokye oli Mosantu wa Nwaphongo.» <sup>70</sup> Yesu amba babuyisa yokye: «Teli nga moto owa eolo, b̄εε Iko mbuka babale? Emba m̄on̄om̄o na b̄εε ali zabulu!» <sup>71</sup> Awoko babona na Yudasi, njwana wa Simo Mosikaliyota. Ph̄o yabaka yo owamuungya, iyo, m̄on̄om̄o na Iko mbuka babale.

## 7

### *Bana nyango na Yesu tebamoanole*

<sup>1</sup> Sima me, Yesu aba nde ikyemikyende o manyete ma Galileya. Taikaka benela ikyemikyende o manyete ma Yuda waabaka Bayuda balukye imoboma. <sup>2</sup> Nzuka eseleko ya Bayuda eya ndalaku ya butwaka phenephe. <sup>3</sup> Bobele, bana nyango bamba ya w̄o ne bekye: «Mana wawa okyende o Yuda ph̄o baekosi ba we, na b̄εε me, bawene bitoma bikyele we. <sup>4</sup> Moto okozingye obokye bato bamoebe, takyele maph̄o me mi ibombo. Ph̄o kokyele bitoma ndengye eye, omiweninya o mokyisi!» <sup>5</sup> Ph̄o, banaa nyango mampenza tebaikaka moanola. <sup>6</sup> Emba Yesu amba w̄o na b̄εε yokye: «Imbele sa nga naino tesikokyi. Imbele saaka b̄εε sakoka.

7 Mokyisi temokokyi iyeina. Kasi nga, mokyisi munzine pho nawo ngakye bitoma ba bée bili bibe. 8 Kyende o eseleko mena. Pho ya nga, esikye omw, pho imbele sa nga naino tesikokyi.» 9 Sima ya iwō babona, amba ikala o Galileya. 10 Kasi waakye banaa nyango o eseleko, ne amba yakye omw, samiweninya, akyekye nde mi ibombo.

*Mateya o eseleko ya ndalaku*

11 Onte ya eseleko, Bayuda bamolukaka emba bamba wo bekye: «Ani baa bi?» 12 Onte ya moluku nwa bato, baikaka ziko pho ye. Bana bawoko bekye: «Ali moto wa maphoo malaa», bayoko bekye: «Phe, kakosa bato.» 13 Na bo babona, moto na monomw tamekaka iwō polele pho ye, pho ya ila Bayuda.

14 Waakoma bée onte ya nkolo ya eseleko, Yesu amba ya kye o Tempelo emba abuto iteya. 15 Bayuda bakamwaka na mateya me emba bamba wo bekye: «Ndengye'ye iyo taika ekola kambe efa maphoo makoma be?»

16 Yesu amba babuyisa yokye: «Mateya ma nga temaute na nga, kasi na owantoma. 17 Bo moto kazingye ikyela phowa ya Nwaphongo, amoeba bo mateya mama maute na Nwaphongo naa bo namiwole nga mampenza. 18 Moto ookowo pho ye, kalukye nkyemw ye mampenza. Kasi ookolukye nkyemw ya owamotoma, ali na maphoo maa phele. Emba bole teboli onte ye. 19 Teli Mose owaephe Mibeko? Kasi nōnō moto monomw onte ya bée takyele bokowo Mibeko: Pho yaye kolukye imboma?» 20 Moluku nwa

bato bamba mobuyisa bēkye: «Oli na molemba o nzoto ya wē! Okolukye ieboma nza?» <sup>21</sup> Yesu amba kula yakpa maloba amba wō na bēe yokye: «Nakyesi nde etoma yōnyō, bēe basō okamo! <sup>22</sup> Mose awōkō na bēe obokye obelekye bana ba bampēle — lauta na bankōkō kasi na Mose phe — emba bēe kolokyele na mokōlō ņwa Sabata. <sup>23</sup> Ka bo bēe kobele moto mokōlō ņwa Sabata sa nka eya obokye Mobeko ņwa Mose mōtō, ka phō yaye kontōmbēle phō nabikye moto mokōlō ņwa sabata? <sup>24</sup> Sakyeka maboo ma bato bo kotene bolombe, kasi tena bolombe na bosembo.»

### *Yesu eli yo Klisto?*

<sup>25</sup> Bato ba Yelusaleme bawōkō bēkye: «Mena teli ookolukye bēe obokye bamobome? <sup>26</sup> Kyeka kawō mi pha emba tebamowole na lowō! Bakonzi ba banga baebaka phele obokye eli nde yo Klisto? <sup>27</sup> Kasi moto oyo, banga toebe biute yo, nzuka imbele samoya Klisto, na moto etaebe biuti yo.» <sup>28</sup> Bobele Yesu owateyaka o Tempelo, aimolaka yokye: «Konzebe! Koebe biuti nga? Kasi sikyi ya na ndengye ya nga mampenza. Owantoma kawō phele, yo otoebe bēe. <sup>29</sup> Nga, namoebe phō naute oka ye, eli yo owantoma.» <sup>30</sup> Emba bambaka luka nde imoakya. Kasi na moto taika na moakya phō ngonga ye teyataaka koka. <sup>31</sup> Onte ya moluku ņwa bato, baikye bamoanolaka, bambaka wō bēkye: «Waamoya Klisto, amokyela bilekyesako biikye koleka bikyele moto oyo?»

### *Batomi bato ikye akya Yesu*

<sup>32</sup> Yaaḅaka ḅée ḅakye mikolo onte ya moluku ḅwa ḅato pho ye, yakomaka o matoo ma ḅafalisayi. Emba ḅanganga ḅanene na ḅafasayi ḅamba ya toma ḅabulusi pho ya imoakya. <sup>33</sup> Yesu amba wo yokye: «Nata kuta kula ḅa na ḅèe ḅwana imbele, emba namokyende oka owantoma. <sup>34</sup> ḅèe wamunduka kasi ontonzwe. Pho elele eyamoba nga, ḅèe otokome om.» <sup>35</sup> Tata wamo, Bayuda ḅabutwaka iwono onte ya ḅèe ḅekye: «Amunakyende mi elele iye eyamobaa ḅanga sakye mozwa? Amokye ḅenga ḅakye minyangwa onte ya ḅaela? Amokye teya ḅaela? <sup>36</sup> Maphoo maawo yo mamana maluke iwō ḅo: ḅèe wamunduka kasi ontonzwe, na obokye: Elele eyamoba nga, ḅèe otokome om?»

### *Pho ya maa ma bomoo*

<sup>37</sup> Mokolo ḅwa suka ya eseleko, muna moolekye nkolo iso, Yesu aesi ya teme, abuto iimola yokye: «Bo moto ali na phowa ya maa, aye oka nga, ambe ya nywa. <sup>38</sup> Moto ookonzanole; ḅo wawo buku pha Nwaphongo: “Uta o ndondo ye, bibale ba maa ma bomoo biamolukwa.”» <sup>39</sup> Awoko ḅabona na Bolobo pha sengyelaka izwa ḅato ḅaamoanolela. Na ḅosembo Bolobo tephataka ḅa pho Yesu tataka zwa naino nkyemo.

### *Bato ḅakabwa pho ya Yesu*

<sup>40</sup> Onte ya moluku, ḅato ḅaokaka maphoo me, ḅakyi ḅekye: «Nde phele, kyeka Moimosi!» <sup>41</sup> Bana ḅekye: «Klisto, eli nde yo.» Kasi ḅayoko ḅakulaka wo ḅekye: «Klisto akokyi itokolo o Galileya? <sup>42</sup> Buku pha Nwaphongo tebowo

obokye amoba wa bosoo Davidi, emba amouta o Βετσελεμ, mokyisi mokyiky iηwaauta Davidi?» <sup>43</sup> Yango mena bato baamba kabwana pho ye. <sup>44</sup> Bato bayoko onte ya δε, balukaka imoakya, kasi na moto monomo taika mokuma.

### *Bakonzi ba Bayuda tebaanole Yesu*

<sup>45</sup> Bobele babulusi bamba ya butwa ooli banganga banene na Bafalisayi. Bamba ya wo na babulusi obokye: «Pho ya'ye δεε toiky ya ne?» <sup>46</sup> Babulusi bamba yabuya bekye: «Moto taawo bokowo moto mona!» <sup>47</sup> Bafalisayi bamba wo na δεε bekye: «Olukakya na δεε imoanolela me?» <sup>48</sup> Onte ya bankumu naa onte ya Bafalisayi, wali monomo omoanolesi? <sup>49</sup> Eli nde moluku ηwa bato batebaebe Mobeke, bato baaza δε!» <sup>50</sup> Kasi monomo onte ya Bafalisayi, Nikodeme owa kyekye oka Yesu phanza, yokye: <sup>51</sup> «Mobeke ηwa banga munyete moto bo naino tomooky naa ieba mapho makyete yo?» <sup>52</sup> Bamba mobuyisa bekye: «Na we toli moto wa Galileya? Luka na bolaa emba wamowene obokye o Galileya, tewakokya itokolo moimosi.»

### *Nwanwasi wa baphemba*

<sup>53</sup> Bamba ya butwa moto na moto o ingambi se.

## 8

<sup>1</sup> Emba Yesu amba ya kyende o ngomba ya ba Olive. <sup>2</sup> Waakoma waa mumbengu, amba kula ya o Tempelo. Emba bo wabaka bato baso baye oka ye, amba ya zala abuto ibateya. <sup>3</sup> Bobele, bateye ba mibeke na Bafalisayi bamba moyelela

na ηwanwasi monomō owazwaka bée na lele mosuu, emba bamba ya moteya onte ya bée baso. <sup>4</sup> Bamba ya wō ne bēkye: «Moteye, ηwanwasi oyo, tomozwe na lele mosuu. <sup>5</sup> O buku pha Mobeko, Mose awō na banga obokye tobome babasi ba ndengye mena na mabanga. Emba we, kowō bo?» <sup>6</sup> Bawōko babona na maumunya ma imobekyisa izengye, phō bazwe eleko ya imophunda. Kasi Yesu, amba ya miinya, abuto iwala nzenze na munsee o manyete. <sup>7</sup> Waaba bée balendendale nde na imotuna mituna, Yesu amba ya miinola, amba ya wō na bée yokye: «Onte ya bée, otowaikakyela isumu, abe moto owa o boo wa imuma ibanga.» <sup>8</sup> Emba kula yo miinya, akuli butwa iwala nzenze o manyete. <sup>9</sup> Waoka bée maphōo mamana, monomō na monomō atati imigbolō, tata na baphomba. Emba Yesu amba ya ikala yo mampenza na ona ηwanwasi owa temekye onte ya iboko. <sup>10</sup> Yesu amba ya miinola, amba ya wō ne yokye: «ηwanwasi, bée bawa? Na moto monomō taikiyi ema ibanga?» <sup>11</sup> Amba ya buya yokye: «Nkolo, moto phe.» Emba Yesu amba ya wō ne yokye: «Na nga me, siiema ibanga. Kyende, kasi tata lolō sakula kyela isumu.»

### *Yesu ali moo ηwa mokyisi*

<sup>12</sup> Yesu akulaka wō na bée yokye: «Nali moo ηwa mokyisi. Moto okombengye, etaatambule o enzombi, amozwa moo mokambe o bomōo.» <sup>13</sup> Emba Bafalisayi bamba ya wō ne bēkye: «Komiwole we mampenza! Munoko ηwa we tolokoki imoanola» <sup>14</sup> Yesu amba babuyisa

yokye: «Eli phele obokye namiwole nga mampenza, kasi munoko nwa nga moli nwa ianola, pho naebe mbale euti nga na mbale ekyekye nga; kasi bεε, toebe biuti nga na bi kye nga. <sup>15</sup> Bεε kosambisa na ndengye ya bomoto. Inga sii sambisa moto. <sup>16</sup> Emba bo enifa obokye na sambisa, isambisa sa nga sili nde phele pho sili nga mampenza, eli na owantoma. <sup>17</sup> O Mobeko nwa bεε mampenza nga bakoma obokye bo noko ya bato babale ikokaa bakokyi iianola. <sup>18</sup> Namiwole nga mampenza, emba Tata owantoma kawo pho nga me.» <sup>19</sup> Emba bamba wo ne bekye: «Ongo ali bi?» Yesu amba buya yokye: «Toonzebe, toebe na Tata. Bowanzebaka, okokakyi ieba na Tata.» <sup>20</sup> Awoko maphoo mamana o elele ekye ambya bεε makabo, waba yo kateya o Tempelo. Moto na monomo taika moakya, pho ngonga ye teyaikaka koka.

### *Ikyende sa Yesu*

<sup>21</sup> Yesu amba kula wo na bεε yokye: «Nakyende, wa munduka, kasi wamowa na masumu ma be. Elele ekyekye nga, tokokyi ikyende omoo.» <sup>22</sup> Emba Bayuda bamba wo bekye: «Ali na maumunya ma imiboma pho kawo yokye: “Elele eya mokyende nga, tokokyi ikyende omoo?”» <sup>23</sup> Yesu amba babuyisa yokye: «Bεε oli bato ba o se, nga nauti o ikolo. Bεε oli bato bamokyisi mumu, nga sili wa mokyisi mumu. <sup>24</sup> Yango mena, nawokyi na bεε obokye wa mowa na masumu ma bεε. Pho na bo toanosi obokye Nali, wamowa na masumu ma bεε.» <sup>25</sup> Emba bamba ya wo bekye: «Iwe oli



nza?» Yesu amba babuyisa yokye: «Ikyiiewole nga uta o etatele. <sup>26</sup> Pho ya b̄εε, nali na maphoo maikye ma iwo na ma isambisa, kasi owantoma kawo phele. Na yaoka nga ne, ili yango ikyi wo nga o mokyisi.» <sup>27</sup> Tebaikaka sosolo obokye abawolekye pho ya Ango. <sup>28</sup> Bobele, Yesu amba ya bawole yokye: «Waamotomba b̄εε Nwana Moto, wamoeba obokye Nali, simbe nakyela maphoo na ndengye ya nga mampenza: Nawo nde maphoo maanteya Tata. <sup>29</sup> Owantoma ali na nga, taika nde nga mampenza, pho nakyele nkolo iso maphoo maamosepelisa.» <sup>30</sup> Waaba yo kawo babona, bato baikye bamoanolaka.

### *Baakolo bana ba Abalayama*

<sup>31</sup> Bobele, Yesu amba ya wo na Bayuda baamoanolaka yokye: «Bo oikasi ifanza maphoo ma nga, oli phele baekosi banga, <sup>32</sup> wamoeba maphoo ma phele emba maphoo me mamoyikola.» <sup>33</sup> Bamba mobuyisa b̄εkye: «Banga toli bana ba Abalayama, tololi baombo ba moto: Pho ya'ye kowo obokye tomoikolama?» <sup>34</sup> Yesu amba ya babuyisa yokye: «Nawo na b̄εε nde phele phele, ngakye, moto okokyele masumu ali moombo nwa masumu. <sup>35</sup> Moombo taaikale nkolo iso o ingambi, kasi nwana, yo kaikale o ingambi pho ya bobele. <sup>36</sup> Bo Nwana aeyikosi, wamoba baakolo bato baaikola be. <sup>37</sup> Naebe obokye b̄εε oli bana ba Abalayama, kasi pho maphoo ma nga te manyolo onte ya b̄εε, kolukye imboma. <sup>38</sup> Nga, nawo maphoo maawene nga oka Tata, kasi b̄εε, kokyele maphoo maoka b̄εε oka ango wa b̄εε!» <sup>39</sup> Bamba mobuyisa

ḃekye: «Ango wa ḃanga, eli Abalayama.»  
 Yesu amba ya wɔ na ḃée yokye: «Bo oli ḃana  
 ḃa Abalayama, kyela bitoma ḃa Abalayama.  
<sup>40</sup> Kasi uḃwanḃwa eye, ḃée kolukye imboma,  
 nga, oewɔsi maphɔɔ ma phele maoka nga oka  
 Nwaphongo. Abalayama taika kyela ḃabona.  
<sup>41</sup> Kasi ḃée, kokyele bitoma ḃa ango wa ḃée.»  
 Bamba mobuyisa ḃekye: «Banga tololi ḃana  
 ḃaabota ḃée mi ebembi! Toli nde ango mɔnɔmɔ,  
 Nwaphongo!»

### *Bana ḃa Molemba*

<sup>42</sup> Yesu amba ya wɔ na ḃée yokye: «Bo  
 Nwaphongo abakyi ɔngɔ wa ḃée, nde wanzin-  
 gaka, phɔ natokɔlɔ oka Nwaphongo namba kula  
 uta nde oka ye. Siika ya na ndengye ya nga  
 mampenza, eli Yo owantoma. <sup>43</sup> Phɔ ya'ye ḃée  
 toosɔsɔlɔ ewɔsi ya nga? Phɔ tookokye iyoka  
 maphɔɔ ma nga. <sup>44</sup> Ango wa ḃée eli Zabulu,  
 emba oli na phowa ya ikokya maphowa ma ango  
 wa ḃée. Uta o etatele abaka nde mobomi wa  
 ḃato, taika miambya i maphɔɔ ma phele phɔ  
 maphɔɔ ma phele temali onte ye. Waakate yo  
 ḃɔɔle, loute o ndondo ye, phɔ ali moto wa ḃɔɔle  
 na ango wa ḃɔɔle. <sup>45</sup> Ka phɔ ya Nga, phɔ na  
 wɔ maphɔɔ ma phele yango mena tonzanole.  
<sup>46</sup> Moto nza, o nte ya ḃée owa munteya isumu  
 sakyela nga? Bo na wɔ maphɔɔ ma phele, phɔ  
 ya'ye ḃée tonzanolele? <sup>47</sup> Moto wa Nwaphongo,  
 kaokye maphɔɔ ma Nwaphongo. Ka ootoli  
 ḃée ḃato ḃa Nwaphongo, yango mena, ḃée  
 toonzokye.»

### *Yesu na Abalayama*

48 Bayuda bamba mobuyisa bεkye: «Toloikaka longa waawoko banga obokye oli Mosamaliya na ná bolobo boβε?» 49 Yesu amba babuyisa yokye: «Phe, sili na bolobo boβε, kasi na kumbele Tata, kasi bεε, toonkumbele! 50 Siika na luka nkyemo nga mampenza, moto mosuu ali okoiyambya na ookosambisa. 51 Naewole nde phele phele, bo moto abanze maphoo ma nga, etawe.» 52 Emba Bayuda bamba ya wo ne bεkye: «Inwanwa eye tombi ya eba obokye oli na bolobo boβε! Abalayama awa, na baimosi me, kasi we koya wo wekye: “Bo moto kabanza maphoo ma nga, etaa we.” 53 Iwe olekyi angu wa banga Abalayama owa wa? Na baimosi baawa me! Iwe kombe mipka nza?» 54 Yesu amba babuyisa yokye: «Bo namitakyi nga mampenza, nkyemo ya nga nde teife na ntina. Eli nde Tata oko ntate, iyo okoanole bεε obokye ali Nwaphongo wa bεε. 55 Bεε toika moeba, kasi nga namoebe. Bo nawoko ngakye simoebe, nde na ba nde ya bεε: Moto wa boole. Kasi na moebe emba na banza maphoo me. 56 Angu wa bεε Abalayama, abaka na nkyisa ya iumunya obokye amowene mokolo nwa nga. Awene mokolo me, emba atondaka na nkyisa.» 57 Waaawo yo babona, Bayuda bamba wo ne bεkye: «Naino tokokye na mambula mako matano, emba wamba wene Abalayama!» 58 Yesu amba ya babuyisa yokye: «Naewole nde phele phele, naino Abalayama sata botama, Nga Nali.» 59 Bobele, bamba ya ongo mabanga pho ya imumaa, kasi Yesu amba mibomba, nono

watokololo yo o Tempelo.

## 9

### *Yesu abikye moto owa pholo miyo*

<sup>1</sup> Waaba Yesu kalekane, amba ya wene moto monomomo owa botama na miyo mapholo.

<sup>2</sup> Baekosi beebamba ya motuna motuna mumu: «Labi, moto oyo apholo miyo pho ya masumu me ndee pho ya masumu ma baboti bee?» <sup>3</sup> Yesu amba buya yokye: «Teli yo naa baboti bee. Kasi eli nde pho ya obokye bitoma ba Nwaphongo biweneene onte ye! <sup>4</sup> Waata baa moo, tosengyesi ikyela bitoma ba owantoma. Waskome mokolo, moto takoyi ikula kyela etoma. <sup>5</sup> Naino ootaba nga o mokyisi, nali moo njwa mokyisi.»

<sup>6</sup> Waawo yo babona, Yesu amba ya towa matee o manyete, aesi ya maphuta na manyete amba ya mainga moto owa pholo miyo me o miyo. <sup>7</sup> Amba ya wo ne yokye: «Kye mikunyola o mbondo ya Silowe». Kyelukye iwo obokye: Toma. Moto owa pholo miyo amba ya kyende, akye mikunyola, waaya butwa yo, abuto iwene.

<sup>8</sup> Babubaa ne na babaka bamowene sooso — pho abaka moongyi — bawoko bekye: «Teli yo owa baka azasi kaongye?» <sup>9</sup> Bana bekye: «Eli nde yo!» Bayoko bekye: «Iyo phe, eli nde moula ne.» Kasi moto owa pholo miyo amba anola yokye: «Eli nde nga.» <sup>10</sup> Emba bamba wo ne bekye: «Ka miyo ma we mambi zibwa ndengye'ye?» <sup>11</sup> Amba buya yokye: «Moto okobangye bee Yesu, aphuti manyete, amanzingyi o miyo, amba wo na nga yokye:

“Kye mikunyola o Silowe.” Bobele nga, namba ya kyende, namba mikunyola emba namba ya butwa iwene.» <sup>12</sup> Bamba ya wo ne bekye: «Moto me, ali bi?» Amba buya yokye: «Nga siebe.»

*Bafalisayi batune moto owa pholoko miyo obiki*

<sup>13</sup> Bobele, baesi ya kye na moto owapholoko miyo oka Bafalisayi. <sup>14</sup> Nzuka mokolo nwaa phutaka Yesu manyete na nwaa mozibolaka yo miyo, yabaka mokolo nwa Sabata. <sup>15</sup> Bafalisayi bamba motuna na bee ndengye'ye eya butwa yo iwene. Amba babuyisa yokye: «Anzinga mungyinda o miyo, na mikunyosi, nabuto iwene.» <sup>16</sup> Onte ya Bafalisayi bana bawoko bekye: «Moto oyo taakumole Sabata, tali moto wa Nwaphongo.» Kasi bayoko bawoko bekye: «Moto wa masumu akokyi izwa bokonzi phaikyela bilekyesako bibi ndengye'ye?» Emba bokabanakye bonyosi onte ya be. <sup>17</sup> Bobele bamba kula tuna moto owa pholo miyo bekye: «Ka we, kowo bo pho ya oezibosi miyo?» Amba buya yokye: «Ali moimosi.»

<sup>18</sup> Kasi waaba bee naino sata banga baboti be, Bayuda tebaikaka eba obokye apholoko miyo amba butwa iwene. <sup>19</sup> Bamba ya tuna baboti ba nwana me motuna mumu: «Moto oyo ali phele nwana wa bee ookowo bee obokye abotama na miyo ma pholo? Emba unwanweye kawene ndengye'ye?» <sup>20</sup> Baboti bamba babuyisa bekye: «Toebe obokye eli nde phele nwana wa banga, abotama na miyo ma pholo. <sup>21</sup> Kasi bo buto yo iwene unwanwa eye, banga toloebe. Omozibosi

miyo nza? Tolomoefbe. Omotune, ali phomba, aimole yo mampenza!» <sup>22</sup> Baboti bée bawoko babona pho bailaka Bayuda. Bée baokanaka itokolo moto munsoko okowo obokye Yesu ali Klisto o ingambi sa makyita. <sup>23</sup> Yango mena, baboti bawoko bekye: «Yo nga ali phomba, omotune yo mampenza.»

<sup>24</sup> Mbala eya ibale. Bafalisayi bamba kula banga moto owa pholoko miyo, bamba wo ne bekye: «Phe Nwaphongo ngambo! Banga toebe obokye moto oyo ali moto wa masumu.» <sup>25</sup> Amba babuyisa yokye: «Nga siebe naa ali moto wa masumu. Naebe nde ekpele yonyo obokye: Napholoko miyo emba unwanwa eye nabuto iwene.» <sup>26</sup> Bamba wo ne bekye: «Aekyesi ye? Aezibosi miyo ndengye'ye?» <sup>27</sup> Amba babuyisa yokye: «Nambo eyimola, kasi bée tookye! Pho ya'ye kozingye obokye nakule eyimola mbala esuu? Emba na bée toli nde na phowa ya ibutwa baekosi bée?» <sup>28</sup> Bobele, Bafalisayi babuto imotola, bamba wo bekye: «Moekosi nwe eli nde we! Banga toli baekosi ba Mose. <sup>29</sup> Banga toebe obokye Nwaphongo awoko na Mose, kasi moto mona, toloebe mbale euti yo!» <sup>30</sup> Moto me amba babuyisa: «Eye eli lowo la ikamwa, obokye bée toebe mbale euti moto oyo, kasi yo anzibosi miyo! <sup>31</sup> Banga toebe obokye Nwaphongo taaokye bato ba masumu. Kasi bo moto ali mosambesi nwa phele, kambe kyela na phowa ya Nwaphongo, Nwaphongo kamookye. <sup>32</sup> Naino tolookyi bawo obokye moto azibosi miyo ma moto owa botama na miyo mapholo.»

<sup>33</sup> Bo moto me tabakyi moto wa Nwaphongo, takokakyi ikyela na ekpele.» <sup>34</sup> Bamba ya buya bekye: «Iwe wabotama onte ya masumu, emba kombe ya loteya?» Bamba movaka o nze.

### *Baapholo miyo ma molimo*

<sup>35</sup> Yesu aesi ya oka obokye bamowiinye. Amba yakye vana ne, amba ya wo ne yokye: «Iwe, koanole Nwana wa Moto?» <sup>36</sup> Amba ya buya yokye: «Yo nza, Nkolo, obokye namoanole?» <sup>37</sup> Yesu amba wo ne yokye: «Ombo mowene. Eli moto okowono na we.» <sup>38</sup> Moto me yokye: «Naanosi, Nkolo» Emba amba kusama o boo phe.

<sup>39</sup> Emba Yesu amba wo ne yokye: «Naya o mokyisi pho ya iya sambisa, pho ya obokye baate baikaka wene bawene, emba baabaka bawene bee sakula wene.» <sup>40</sup> Bafalisayi baabaka ne baokaka mapho me, bamba wo ne bekye: «Bobo na banga topholo miyo me?» <sup>41</sup> Yesu amba babuyisa yokye: «Bo wabaka bato baapholo miyo, nde tobakyi na masumu. Kasi unwanwa eye kowo obokye: "Towene", oli nde bato ba masumu bobele.»

## 10

### *Ete ya mookosi wa mampate*

<sup>1</sup> «Naewole nde phele phele obokye, moto owa moba sanyolo yaa mozibo o lophango la mampate, kasi kabaa mopha mosuu, yo mona ali mwibi na mobomi. <sup>2</sup> Kasi okonyolo yaa mozibo, ali mookosi njwa mampate. <sup>3</sup> Sinzili amozibolela mozibo, na mampate maokye njwesi

nwe. Mampate me, kamabange, yonyo na yonyo na nkombo ya yango, emba kamatokolo o nze. <sup>4</sup> Waamatokolo yo maso, katambule o boo pha mango, emba mamobengye pho maebe ηwesi nwe. <sup>5</sup> Ete maabengye mobutu, kasi mamolota pho temaebe ηwesi ηwa babutu.»

<sup>6</sup> Yesu amba bakpela ete mena, kasi tebaika sosolo ntina ya maphoo maawoko yo.

*Yesu, Mobanze molaa wa mampate*

<sup>7</sup> Yesu amba kula wo yokye: «Naewole nde phele phele ngakye, nali mozibo ηwa mampate.

<sup>8</sup> Baso baaya o boo pha nga bali baibi na babomi, kasi mampate temaika baoka. <sup>9</sup> Inga, nali mozibo. Bo moto anyosi o nzela ya nga, amobika. Amokyende, amoya amba zwa na ya iza. <sup>10</sup> Moibi yo kaye nde pho ya iifa, pho ya ifoma na pho ya icto. Nga, naya pho ya obokye bato bazwe bomoo, bambe bozwa na boikye.

<sup>11</sup> Nga, nali mookosi molaa wa mampate: Mookosi molaa kambya bomoo phe pho ya mampate me. <sup>12</sup> Ka moto okokyele etoma nde pho ya iphuti, tali owakolo mookosi wa mampate, tali na mokolo ηwa mampate. Waawene yo ngoo kyeye, kaikye ika mampate emba yo kalote. Emba ngoo kaya mabuta kambe na manyangola.

<sup>13</sup> Pho ali moto okokyele etoma nde pho ya iphuti emba mampate temali na ntina pho ye.

<sup>14</sup> Nga, nali mookosi molaa wa mampate, naebe mampate ma nga na mampate ma nga manzebe.

<sup>15</sup> Boo konzebe Tata, na nga naebe Tata. Emba nambya bomoo pha nga pho ya mampate. <sup>16</sup> Nali



na mampate masuu maate mali ma lophango lolo. Emba na mango mamana, nasengyesii imakamba. Ma mooka njwesi njwa nga emba ya moba nde bokanda bokobo ná mookosi monomo. <sup>17</sup> Tata kanziingye pho naambya bomoo pha nga pho ya ikula bozwa sima. <sup>18</sup> Moto taika bololo bomoo pha nga, kasi naboambya nga mampenza. Nali na bokonzi pha iboambya na ná bokonzi pha ikula bokpa: Mena eli mobeko njwa zwa nga na Tata.»

<sup>19</sup> Maphoo me mamba kula ambya nde ikabana onte ya Bayuda. <sup>20</sup> Baikye onte ya bee bamba wo bekye: «Ali na bolobo bobo! Ayeyee! Pho ya'ye bee komookye?» <sup>21</sup> Kasi baayoko bawoko bekye: «Mena teli maphoo ma moto oli na bolobo bobo, bolobo bobo akokyi izibola miyo ma moto owa pholo miyo?»

### *Bayuda bale Yesu*

<sup>22</sup> Yabaka imbela sa sekya. Bakyelaka eseleko ya iumunya mokolo njwa ingolaka bee Tempelo o Yelusaleme. <sup>23</sup> O Tempelo, Yesu abaka kakye kaye o mozibo njwa Salomo. <sup>24</sup> Bayuda baesi ya molungya, bamba wo ne bekye: «Waa lolle ntema o ikolo nono mokolo ye? Bo oli Klisto, oloimole polele!» <sup>25</sup> Yesu amba ya babuyisa yokye: «Nambo eyimola kasi bee toanole. Bitoma biikyele nga na nkombo ya Tata biwo pho ya nga, <sup>26</sup> kasi bee tonzanole pho toli mampate ma nga. <sup>27</sup> Mampate ma nga maokye njwesi njwa nga, emnba nga namaebe, mambe na mbenga. <sup>28</sup> Emba nga, namaphe bomoo pha bobele. Ete mawe na mbala, na moto takokyi imabololo o

maboko ma nga. <sup>29</sup> Tata owa mampe alekyi na mwiya, emba na moto tali na makokyi ma ifololo ekpele o maboko ma Tata. <sup>30</sup> Nga na Tata toli moto monomo.»

<sup>31</sup> Bobele, Bayuda bamba kula ya ongo mabanga pho ya imumaa. <sup>32</sup> Kasi Yesu amba ya babuyisa yokye: «Naeteye bitoma biikye bilaa bauta oka Tata. Pho ya etoma iye ekyembe b̄e maa mabanga?» <sup>33</sup> Bayuda bamba mobuyisa b̄ekye: «Banga telolukye iemaa mabanga pho ya etoma elaa ekyesi we, kasi pho kotole Nwaphongo, na pho iwe oli nde moto, komibuya we mampenza Nwaphongo.» <sup>34</sup> Yesu amba ya babuyisa yokye: «O buku pha Mbeko nwa b̄e, tebaika koma obokye: “Nga nawo ngakye: B̄e oli ba Nwaphongo?” <sup>35</sup> Mbeko nwabangaka ba Nwaphongo bato baawolekye Nwaphongo. Nzuka mapho maakomama o buku pha Nwaphongo temakokyi imana. <sup>36</sup> Ka owa kaba na owa toma Nwaphongo o mokyisi, b̄e kowo obokye: “Kotole Nwaphongo”, pho nawo ngakye nali Nwana wa Nwaphongo. <sup>37</sup> Bo sikyele bitoma ba Tata, b̄e sa nzanola! <sup>38</sup> Kasi bo nabikyele, na bo tonzanole, anola nono bitoma, pho oebe, ombe na eba na bolaa obokye Tata ali onte ya nga nde booli nga onte ya Tata.» <sup>39</sup> Emba, bamba kula luka mbala esuu ya imoakya, kasi amba ya bembetene o maboko ma b̄e.

<sup>40</sup> Yesu amba kula ya butwa o mopha moyoko nwa Yaladene, o elele eyabaka Yoane kabatisa phanza, emba amba ikala om̄o. <sup>41</sup> Bato baikye bamba ya ooli yo, bamba wo b̄ekye: «Ph̄e, Yoane taika kyela na elekyesako yonoyo, kasi iso

ya wɔ yo phɔ ya moto oyo ili phele.» <sup>42</sup> Emba omɔ, bato baikye bamba moanola.

## 11

### *Iwa sa Lazalo*

<sup>1</sup> Yabaka moto mɔnɔmɔ na nkombo Lazalo, abaka na bolɔsi o Betani, mokyisi nwa Maliya na nwana nyango Malata. <sup>2</sup> Eli nde ona Maliya owa ɔlɔlɔkɔ Nkolo malasi na owa mokunyolaka makolo na suwe ye. Yabaka nwana nyango Lazalo owabaka na bolɔsi. <sup>3</sup> Mankanasa ma Lazalo maamba longɔlɔ Yesu obokye: «Nkolo, kyeka ookozingye we ali na bolɔsi.» <sup>4</sup> Waaoka Yesu babona, amba wɔ yokye: «Bolɔsi babona teboli pha iwaa, kasi boli phɔ ya iweninya nkyemɔ ya Nwaphongo. Nde na phango, bamokumola Nwana wa Nwaphongo.»

<sup>5</sup> Yesu azingaka Malata na nwana nyango na Lazalo. <sup>6</sup> Kasi waoka yo simo obokye Lazalo ali na bolɔsi, nde phele, akulaka kyela nkolo ibale o elele eyabaka yo. <sup>7</sup> Bobele, sima me, amba ya wɔ na baekosi yokye: «Tokule butwa o Yuda.» <sup>8</sup> Baekosi bamba ya wɔ ne bekye: «Labi, nde unwanwa eye Bayuda balukakyi iema mabanga, emba kokule butwa omɔ?» <sup>9</sup> Yesu amba buyaa yokye: «Tewali mangonga iko mbuka mabale ma moo? Bo moto katambule wa moo, taabakatane phɔ kawene moo nwa mokyisi. <sup>10</sup> Kasi bo moto katambule waa mokolo, amobakatana phɔ moo temoli onte ye.»

<sup>11</sup> Waaunva yo iwɔ babona, amba ya wo na bɛɛ yokye: «Nwebi na banga Lazalo alasi, kasi na kye moumola.» <sup>12</sup> Baekosi bɛɛ bamba ya wɔ

ne bεkye: «Nkolo, bo alasi, amobika.» <sup>13</sup> Yesu awoko babona pho ya iwa sa Lazalo, kasi bεε baumunyaka nde obokye kawo pho ya eyaakolo ebu. <sup>14</sup> Yesu amba ya bawole polele yokye: «Lazalo awe, <sup>15</sup> emba nali na nkyisa pho sikyi ba omw, pho bεε oanole. Kasi tokyende oka ye.» <sup>16</sup> Emba Toma, okobangye bεε Ipasa, amba ya wo na baekosi bayoko yokye: «Na banga tokyende me, emba towe ne molongo.»

*Yesu mokundosi nwa bawee na okophe bomwo*

<sup>17</sup> Wakoma yo omw, Yesu akye zwa obokye Lazalo ambo kyela nkolo ine o ilita. <sup>18</sup> Yelusaleme na Betani bali na itakye sa bakilometele phenephe na baato. <sup>19</sup> Baikye onte ya Bayuda bayakaka oka Malata na Maliya pho ya iya zala na bεε pho ya nwana nyango na bεε owawaka.

<sup>20</sup> Waaoka Malata obokye Yesu kaye, amba ya kye mobenga o nzela, mene Maliya aikasi azasi o ingambi. <sup>21</sup> Emba Malata amba ya wo na Yesu yokye: «Nkolo, bo wabaka wawa, nwana mama nde tawa. <sup>22</sup> Kasi na inwanwa eye me, naebe obokye iso ya moonga we oka Nwaphongo, Nwaphongo amoephe yango.» <sup>23</sup> Yesu amba wo ne yokye: «Inwana nyongo amokundwa.» <sup>24</sup> Malata amba ya mobuyisa yokye: «Naebe obokye amokundwa imbele saa mokundwa bawe o mokolo nwa suka.» <sup>25</sup> Yesu amba ya wo ne yokye: «Nga nali moto okokundole bawee, na okophe bomwo, moto okonzanole, na bo awe amoba nde na bomwo. <sup>26</sup> Emba moto muso oli na bomwo kambe na nzanola etawe.

Koanole bomo?» <sup>27</sup> Amba mobuyisa yokye: «Eε Nkolo, nga naanosi obokye oli Klisto, Nwana wa Nwaphongo, ookoye o mokyisi.»

### *Yesu alesi*

<sup>28</sup> Waaunva yo iwɔ babona, amba ya kye banga ηwana nyango Maliya, amba kolo ne yokye: «Moteye aesi, kaebangye.» <sup>29</sup> Waaoka Maliya babona, aesi ya inwa izele, aesi kyende oli yo. <sup>30</sup> Yesu tataaka nyolo o mokyisi, kasi ataka ba nde oelele eya vanaka Malata ne. <sup>31</sup> Bayuda babaka na Maliya o ingambi phɔ ya izala ne, waamowene bεε aino izele, atokosi, bamba ya mobenga, baumunyaka obokye kakye o ilita phɔ ya ikye lela omɔ. <sup>32</sup> Waakoma Maliya o elele eya baka Yesu, wamowene yo amba ka o makolo me, amba wo ne yokye: «Nkolo, bo wabaka wawa, ηwana mama nde tawa.» <sup>33</sup> Waba wene yo banyingonele, Maliya na Bayuda babaka ne, Yesu aokaka ngongo boikye na bolosi o ndondo ye. <sup>34</sup> Emba amba ya batuna yokye: «Bεε wamokunda wa?» Bamba mobuyisa bεkye: «Nkolo, yaka ya kyekye.» <sup>35</sup> Yesu amba ya lela. <sup>36</sup> Emba Bayuda bεyke: «Kyeka bo wamozingaka yo.» <sup>37</sup> Bakyi onte ya bεε bεkye: «Moto owa zibolaka miyo ma moto owa pholo miyo, taikyi koka ikatela Lazalo iwa.»

### *Yesu akundosi Lazalo*

<sup>38</sup> Bobele Yesu amba kula ya oka ngongo o motema amba ya kyende o ilita. Yabaka mobongu onte ya mafanga emba ifanga sazibaka muna mobongu. <sup>39</sup> Emba Yesu amba ya wo yokye: «Manya ifanga sisi.» Malata,

nkanasa ya mowe, amba wɔ nɛ yokye: «Nkolo, kaye solo, phɔ ambo kyela nkolo ine.» <sup>40</sup> Kasi Yesu amba mobuyisa yokye: «Siika wɔ na wɛ ngakye, bo oanosi, wamowɛnɛ nkyɛmo ya Nwaphongo?» <sup>41</sup> Bobɛɛ, bamba ya manya ifanga. Yesu amba ya tomba miyo o ikolo, amba wɔ yokye: «Tata, naephɛ mɛɛsi phɔ onzokyi. <sup>42</sup> Phɛɛ, naebe obokye konzokye nkolo iso, kasi nawɔ babona phɔ ya moluku moondungye, phɔ baanole obokye iwɛ wantoma.» <sup>43</sup> Waawɔ yo babona, amba ya anwana na bokusi yokye: «Lazalo, tɔkɔlɔ!» <sup>44</sup> Emba mowee aesi ya tɔkɔlɔ, makolo na mabɔkɔ makangyemi na bitato, na boo phɛ bozingami na etobu. Yesu amba ya wɔ na bɛɛ yokye: «Omoingole emba omole kakyɛndɛ!»

### *Bawangyele Yesu*

<sup>45</sup> Bayuda baikye onte ya baayakaka yakyeka Maliya, na bawɛnɛkyɛ yaakyelaka Yesu, bamba moanolela. <sup>46</sup> Kasi bayɔkɔ onte ya bɛ, bamba ya kyɛ imola Bafalisayi iso yakyelaka Yesu. <sup>47</sup> Banganga banɛnɛ na Bafalisayi bamba ya angyinya ikyita bamba wɔ bɛkyɛ: «Tokyele bo? Moto oyo kakyele bilekyesako biikye. <sup>48</sup> Bo tomokyekyi bokyeki babona, bato basɔ bamoanolela. Baloma bamoya ɔtɔ elele esantu ya banga na mokyisi nwa banga.»

<sup>49</sup> Kaifa, mɔnɔmɔ na bɛ, owa baka nganga o munɛnɛ o mbula mɛ, amba wɔ na bɛɛ yokye: «Bɛɛ toosɔsɔlɔ <sup>50</sup> toombe na eba obokye eli bolaa phɔ ya bɛɛ obokye moto mɔnɔmɔ awe phɔ ya bato, naa obokye mokyisi mobimba mowe.»

<sup>51</sup> Taika wɔ ɓaɓona na ndengye ye, kasi waɓaka yo nganga o munene, o mbula me, ambaka imola obokye ya sengyelaka obokye Yesu awe pho ya mokyisi. <sup>52</sup> Teli nde pho ya mokyisi ɓobeɓe, kasi pho ya iyangyinya elele yɔnɔyɔ ɓana ɓa Nwaphongo ɓaanyangwa. <sup>53</sup> Emba nde mokolo me, ɓamba wanga imoboma. <sup>54</sup> Yango mena, Yesu takulaka tambula mi pha onte ya Bayuda. Amba ya kyende o manyete mali phenephe na obokye, o mokyisi mɓangye ɓee Efalayime, azalaka omɔ yo na ɓaekosi ɓe.

<sup>55</sup> Eyenga ya Ilekana ya Bayuda yakomaka phenephe. Oɓoo pha eyenga ya Ilekana, ɓato ɓaikye ɓautaka o mangonda ɓakyekye o Yelusaleme pho ya imipetola. <sup>56</sup> Balukaka Yesu, emba onte ya Tempelo waabaka ɓe, ɓawɔnɔko ɓekye: «Bee koomunya ɓo? O eseleko etaye?» <sup>57</sup> Banganga ɓanene na Bafalisayi ɓambyaka mitindo obokye: Moto munso wamoeba elele eli yo, asengyesi eyimola pho ɓamoakya.

## 12

### *Maliya aɓɓsi Yesu malasi o makolo*

<sup>1</sup> Nkolo motoba o ɓoo pha eyenga ya Ilekana, Yesu aesi ya koma o Betani, waabaka Lazalo owa kundolaka yo onte ya ɓawe. <sup>2</sup> Omɔ, ɓamba ya za ne. Malata abaka kakabe ntoma kasi Lazalo abaka monomɔ na ɓaɓaka ne o mesa. <sup>3</sup> ɓobeɓe, Maliya amba yakpa molangyi nwa malasi nwayakya ɓee na nale nwa motiya moikye. Aesi ya maɓɓo o makolo ma Yesu, amba makunyola na suwe ye, emba ingambi

satondaka na solo ya mana malasi. <sup>4</sup> Bobele, Yudas Mokyeliyota, monomō na baekosi bée, eli nde ona yo owamuungya, yokye: <sup>5</sup> «Pho ya'ye tebaungye malasi mamana na nkama iyato ya ba denale, pho ya ibaphe babola?» <sup>6</sup> Awoko babona, pho teli obokye ali na ngongo ya babola, kasi pho abaka moibi na obokye, yo mobombi nwa baphalanga, abaka kaike baphalanga babaka bée bamophisa. <sup>7</sup> Emba Yesu amba wo yokye: «Omole! Abanza lowo lokyesi yo pho ya mokolo nwa munkunda be. <sup>8</sup> Babola, oli na bée nkolo iso, kasi nga, otoobe na nga pho ya bobele.»

### *Bawangyele Lazalo*

<sup>9</sup> Emba moluku moikye nwa Bayuda baokaka obokye Yesu abaka omō, kasi tebaikaka ya nde pho ya Yesu yo mampenza, kasi nde pho ya ikyeka Lazalo owa kundolaka yo onte ya bawee. <sup>10</sup> Tata wamō, Banganga banene bamba wangya obokye babome na Lazalo me, <sup>11</sup> pho yabaka nde pho ye, Bayuda baikye babalotaka babutwaka ianola Yesu.

### *Yesu anyosi o Yelusaleme*

<sup>12</sup> Bo yana, moluku nwa bato nwaakaka o eseleko, nwaamba oka obokye Yesu amoya o Yelusaleme. <sup>13</sup> Bamba kpa kanga ya mabila bamba tokolo ikye vana ne. Babaka baanwane bekye: «Ozana! Nkolo apambole okoye na nkombo ye, mokonzi nwa Isalayele.» <sup>14</sup> Waazwa Yesu nwana wa mpunda, amba zala o ikolo sa yango bo wakomama wango obokye: <sup>15</sup> Saila nwana nwasu wa Siyona: Kyeka mokonzi kaye, abaa ikolo sa nwana mpunda. <sup>16</sup> O



ebandele baekosi bée tebaikaka sosolo maphoo maaye, kasi imbele sazwa Yesu ngambo, bamba umunya obokye maphoo me makomamaka pho ye, na obokye eli nde mango makyela bée pho ye. <sup>17</sup> Moluku nwa bato nwaabaka ne imbele sabangaka yo Lazalo itokolo onte ya ilita na wa mokundola yo onte ya bawee, baimolaka maphoo mawenekye be. <sup>18</sup> Yango mena moluku nwa bato bayakaka ya vana ne pho baokaka elekyesako eya kyelaka yo. <sup>19</sup> Emba Bafalisayi bamba wono onte ya bée bekye: «Ka kowene, otokule kyela na ekpele, kyeka bato baso babuto imobenga!»

### *Nkyemo na ekulusu*

<sup>20</sup> Bato bayoko baatebali Bayuda bakyekeye o eseleko pho ya ikumbela. <sup>21</sup> Bamba ya wo na Filipe owabaka wa Betesayida ya Galileya emba bamba onga ne bekye: «Nkolo, toli na phowa ya iwene Yesu.» <sup>22</sup> Filipe amba yakye lowole Andele, emba bée baso bamba yakye lowole Yesu. <sup>23</sup> Yesu amba babuyisa bobo: «Imbele sisengyesi Nwana wa moto izwa ngambo sikokyi. <sup>24</sup> Naewole nde phele phele, bo mumbuma nwa ble moka o manyete te mowee, moikale nwango mampenza. Kasi bo mowee, mobote mbuma nzikye. <sup>25</sup> Moto okozingye bomoo phe, aabobungya; kasi moto owamoina bomoo phe onte ya mokyisi mumu, aabobanza nono o bomoo pha bobele. <sup>26</sup> Bo moto kazingye inkyelela, ambengye, emba elele eli nga, na moto wa nga wa etoma amoba omoo. Bo moto kankyelele, Tata amokumola.»

### *Yesu aimosi bo wamowa yo*

<sup>27</sup> «Uḡwanḡwa eye, ndondo ya nga teli bose. Emba namba wɔ bo? Tata, ombikya o imbele sisi? Kasi naya nde phɔ ya sina imbele sisi. <sup>28</sup> Tata, phe nkombo yawe ngambo.» Emba ḡwesi mɔnɔmɔ mouti o ikolo mowɔ obokye: «Naeephɛ ngambo, emba namokula eephɛ ngambo.» <sup>29</sup> Moluku ḡwa bato ḡwabaka wamɔ na baokaka bekye eli engyinzi, baayoko bawoko bekye eli anzelu moto omowosi. <sup>30</sup> Yesu amba ya buya yokye: «ḡwesi mamuna temoikyi okana phɔ ya nga, kasi nde phɔ ya bɛɛ. <sup>31</sup> Uḡwanḡwa eye eli isambisa sa mokyisi mumu, uḡwanḡwa eye bamovaka mokonzi ḡwa mokyisi o ibanda. <sup>32</sup> Phɔ ya nga, imbele sa moɓaa nga o ikolo, namobenda bato basɔ oka nga». <sup>33</sup> Na maloba mamana, aimolaka ndengye eya mowa yo. <sup>34</sup> Moluku ḡwa bato ḡwamba mobuyisa obokye: «Banga Mobeko ḡwaloimola obokye Klisto amobaa bobele. Ndengye'ye we okokyi iwɔ obokye ḡwana wa moto amobaa o ikolo? Yo nza, ona ḡwana wa moto?» <sup>35</sup> Emba Yesu amba wɔ na bɛɛ yokye: «Moo motaa baa onte ya bɛɛ phɔ ya ḡwana imbele. Tambula imbele sili bɛɛ na moo, phɔ ya obokye enzɔmbi yango saeziba. Phɔ ookotambule o enzɔmbi, taebe mbale ekyekye yo. <sup>36</sup> Wata ba bɛɛ na moo, omoanole phɔ ya ibutwa bana ba moo.»

### *Bayuda tebaanole Yesu*

Waaunva yo ibawole babona, Yesu amba ya mana wali bɛɛ, akye mibomba. <sup>37</sup> Naɓo wakyela yo bilekyesako biikye o miyo ma be, tebaika

moanola. <sup>38</sup> Pho maphoo mawoko moimosi Isaya obokye: Nkolo, owanosi yaoka banga nza? Na eboko ya Nkolo yamiteya oka nza? Makokyisame. <sup>39</sup> Nde ona Isaya akula imola ntina ye ete yakokaka bee anola: <sup>40</sup> Aphose miyo ma be, ambi nabuya ntema ya bee nkusi, pho bee sawene na miyo ma be, obokye ntema ya bee sa sosolo, obokye bee sabongola ntema, emba nde na babikye! <sup>41</sup> Isaya kawo babona pho awene nkyemo ye na obokye awo pho ye. <sup>42</sup> Nabo babona, baikye onte ya bakambi, bamoanolaka. Kasi pho ya Bafalisayi tebamekaka na iwo, pho ya iila obokye nde babatokosi o ingambi sa makyita: <sup>43</sup> Pho bazingaka nkyemo ekyiute na bato o elele ya nkyemo ikyiute na Nwaphongo.

### *Pho ya mateya ma Yesu*

<sup>44</sup> Yesu amba ya anwana yokye: «Okonzanole, taanole nga, kasi kaanole Owantoma, <sup>45</sup> ebe moto ookonvene, kawene na Owantoma me. <sup>46</sup> Inga, moo, naesi o mokyisi pho moto munsu okonzanole abe saba o enzombi. <sup>47</sup> Bo moto aokyi maphoo ma nga, tambe mabanza, teli nga okomosambisa: Pho sikyi ya sambisa mokyisi, kasi naesi nde iya bikya mokyisi. <sup>48</sup> Moto okonde na otoanole maloba ma nga ali na mosambise: Iloba siiwo nga, samosambisa o mokolo nwa suka. <sup>49</sup> Sikyi wo pho ya nga mampenza, kasi Tata owantoma anteya isengyesi nga iwo na iimola. <sup>50</sup> Emba naebe obokye motindo nwe eli bomoo pha bobele: Ikyi wo nga, naiwo nde bowanvole Tata.»

# 13

## *Yesu akunyosi makolo ma baekosi be*

<sup>1</sup> O boo pha eyenga ya Ilekana, Yesu aebaka obokye imbele se saimana o mokyisi mumu oikyende oka Ango sikokyi, yo owazingaka bato bee bali o mokyisi, abazingaka tee nono o suka. <sup>2</sup> Emba waaba bee baze, Zabulu amba nyosa maumunya mabe o ndondo ya Yudasi Mokyeliyota, obokye amungya, <sup>3</sup> Yesu aebaka obokye Ango apha mbolo iso o maboko me, pho auta na Nwaphongo emba amobutwa oka Nwaphongo, <sup>4</sup> Aesi ya mana o mesa, amanye bitobu, akpe etato yonyo, amba mikanga o mobimbi. <sup>5</sup> Bobele, amba yaangola maa o beseni, atati ikunyola makolo ma baekosi, kambe manya maa na etato eyamikanga yo o mobimbi.

<sup>6</sup> Wakoma yo oka Simo Petelo, Petelo amba wo ne yokye: «Nkolo, iwe konkunyole makolo?» <sup>7</sup> Yesu amba mobuyisa yokye: «Ikyikyele nga, tokokyi ieba unwanwa eye, kasi wamoisoso sima.» <sup>8</sup> Petelo amba wo ne yokye: «Inkunyola makolo! Tewakokyi ikyelama!» Yesu amba mobuyisa yokye: «Bo siekunyosi, tokokyi iba na nga elele yonyo.» <sup>9</sup> Emba Simo Petelo amba ya wo ne yokye: «Nkolo, sankunyola nde makolo na makolo, kasi na maboko na moto!» <sup>10</sup> Yesu amba ya wo ne yokye: «Moto oumbo o, ali munsu peto, tasengyesi ikula mikunyola, bote ebee nde malolo phe. Ka bee, bee oli peto, kasi bee baso phe.» <sup>11</sup> Pho aebaka moto owamungya, yango mena amba wo yokye: «Bee baso toli peto.»

<sup>12</sup> Waaunva yo ibakunyola makolo, aesi ya kpa bitobu bε, akuli ya nkyε zala o mesa amba ya wɔ na bεε yokye: «Bεε osɔsɔsi lowɔ lookyesi nga phɔ ya bεε? <sup>13</sup> Bεε kombangye “Moteye na Nkolo”, kowɔ phele, phɔ nali bomɔ. <sup>14</sup> Emba bo nga, Nkolo na Moteye, naekunyosi makolo, na bεε osengyesi ikunyolana makolo. <sup>15</sup> Phɔ naephε ndakisa obokye, ikyesi nga na bεε, na bεε oikyele mε. <sup>16</sup> Naewɔle nde phele phele obokye, moombo taalekye nkolo wε, na toma talekye moto oo motomi. <sup>17</sup> Bo koebe maphɔ mamana, wamoba na nkyisa bo waamakelela. <sup>18</sup> Siwɔ phɔ ya bεε basɔ, naebe baawɔlɔ nga. Kasi phɔ ba wɔ buku pha Nwaphongo obokye: Okoze na nga ipa molongɔ, abuto mbomi ya nga. <sup>19</sup> Naewɔle unwanwa eye, o boo pha lowɔ mε iya. Phɔ, waamoya lango, oanole oboke “nga nali booli nga”. <sup>20</sup> Naewɔle nde phele phele obokye: Owamoyamba moto otomi nga, kayambe nga mampenza, ka okonzambe kayambe na moto owantoma.»

### *Yudasi aungye Yesu*

<sup>21</sup> Waaunva yo iwɔ babona, Yesu amba oka ngɔngɔ o motema, amba wɔ yokye: «Naewɔle nde phele phele, monomɔ onte ya bεε amunzungya.» <sup>22</sup> Baekosi bamba kyekana, bamba mituna bεkye, kanewɔ na nza? <sup>23</sup> Monomɔ na baekosi bε, owabaka Yesu kalɔbɔ zinga, azalaka phenephε na Yesu. <sup>24</sup> Simo Petelo amba munyatela miyo yokye: «Omotune, kaanewɔ na nza.» <sup>25</sup> Moekosi amba ya mibanza o ntolo ya Yesu, amba motuna yokye: «Nkolo, eni ba

nza?» <sup>26</sup> Yesu amba mobuyisa yokye: «Eli owamophe nga ete ya ipa eya munyinya nga o subu.» Waaunva yo iwɔ babona, Yesu amba yakpa ete ya ipa eya nyinyaka yo o subu, amba ya ephe Yudasi Mokyeliyota, ηwana wa Simo. <sup>27</sup> Emba nde o sina imbele saamophe yo ena ete ya ipa, Molemba aesi ya nyolele Yudasi. Bobele Yesu amba wɔ ne yokye: «Loozingye we ikyela, olokyele izele.» <sup>28</sup> Na monomo na be baso babaka o mesa taikaka sosolo pho ya'ye awoko babona. <sup>29</sup> Bo wabaka Yudasi mobombi ηwa baphalanga, baayoko baumunyaka obokye Yesu awoko ne pho ya iyomba ya sengyelaka pho ya eseleko, naa pho ya iphe babola ηwana ekpele. <sup>30</sup> Ka Yudasi, wakpa yo ete ya ipa, amba ya tokolo. Yabaka enzombi.

### *Mobeko ηwa sika*

<sup>31</sup> Waatokolo Yudasi, Yesu amba wɔ yokye: «Uηwanwa eye, Nwana wa moto ambo zwa ngambo, na Nwaphongo azwe ngambo pho ye. <sup>32</sup> [Bo Nwaphongo azwe ngambo pho ye], Nwaphongo amophe ne ngambo bo eeli ne. Emba sakoko amophe ngambo. <sup>33</sup> Bana ba nga, sikuli ba na be elinga. Wamunduka, emba nde bo wawo nga na Bayuda obokye: “Bi kye nga, be otokome omo”, naewole na be uηwanwa eye.

<sup>34</sup> Naephe mobeko ηwa sika: Zingana be na be. Bo waezinga nga, na be ozingane be na be. <sup>35</sup> Boozinga be na be, na bomo, bato baso bamoefa obokye be oli baekosi ba nga.»

### *Yesu aimosi obokye Petelo aamoangana*

<sup>36</sup> Simo Petelo amba ya wɔ ne yokye: «Nkolo, kokye bi?» Yesu amba mobuyisa yokye: «Bi kye nga, tokokyi imbenga unwanwa eye, kasi wamumbenga sima.» <sup>37</sup> Petelo amba wɔ ne yokye: «Nkolo, phɔ ya'ye sikokyi iyebenga unwanwa eye? Namoambya bomɔɔ pha nga phɔ ya we!» <sup>38</sup> Yesu amba ya mobuyisa yokye: «Wamoambya bomɔɔ pha we phɔ ya nga? Naewɔle nde phele phele ngakye: Wamunzangana mbala iyato soo sabotɔngɔkye.»

## 14

### *Yesu ali nzela ekyekambe oka Tata*

<sup>1</sup> «Mandondo ma bɛɛ satungyisama, anola Nwaphongo, onzanole na nga. <sup>2</sup> O ingambi sa Tata, bilele ba ifaa bili biikye, bo teefakyi bomɔ, nde naewɔlekyi obokye nakyende ebongyisela elele eya moɓa bɛɛ? <sup>3</sup> Emba wamokyende ebongyisela nga elele, na mokula yaekpa, phɔ elele eli nga na bɛɛ obe omɔ me. <sup>4</sup> Na bi kye nga, bɛɛ koebe nzela.» <sup>5</sup> Toma amba ya wɔ ne yokye: «Nkolo, toloebe bi kye we, tombaeba ena nzela ndengye eye?» <sup>6</sup> Yesu amba ya wɔ ne yokye: «Nga nali nzela, na phele, na bomɔɔ. Moto takokyi ikyende oka Tata, bo taleka oka nga. <sup>7</sup> Bo onzebakiyi, na Tata nde omoebakiyi. Tata unwanwa eye omoebi, emba omoweni.» <sup>8</sup> Filipe amba ya wɔ ne yokye: «Nkolo, oloteya Tata, mena oka ɓanga wakokyi.» <sup>9</sup> Yesu amba ya wɔ ne yokye: «Nali na bɛɛ wawa elinga, emba we Filipe toonzebe! Moto oo nveni aweni Tata. Phɔ ya'ye kowɔ wekye: "Oloteya Tata?" <sup>10</sup> Toanole obokye

nga nali onte ya Tata, emba Tata ali onte ya nga? Maphoo maewole nga, si mawo na ndengye ya nga mampenza! Kasi eli nde Tata ooli onte ya nga, okokyele bitoma b̄eε. <sup>11</sup> Onzanole, nga nali onte ya Tata, emba Tata ali onte ya nga. Bo toone anola maphoo ma nga, anola nono pho ya bitoma bibi. <sup>12</sup> Naewole nde phele phele, moto okonzanole amokyela ne bitoma bikyele nga, amokyela na bitoma bilekyi bonene, pho nga nakyende oka Tata. <sup>13</sup> Iso yamoonga b̄eε na nkombo ya nga, namoikyela, pho obokye Tata azwe ngambo onte ya Nwana. <sup>14</sup> Boonzongyi ekpele na nkombo ya nga, namoekyela.»

### *Mbunu ya itoma Bolobo*

<sup>15</sup> «Bo konzingye, wamokumola mibeko ma nga. <sup>16</sup> Nga namoonga na Tata, amoetomela Moambelesi mosuu owa moba na b̄eε pho ya bobele. <sup>17</sup> Eli yo Bolobo owa phele, iyo ootokokyi mokyisi iwene na ieba. Beε, b̄eε komoebe, pho ali phenephe na b̄eε na onte ya b̄eε.

<sup>18</sup> Esieyikye biika, namokula ebutolela. <sup>19</sup> Eikasi nde nwana bokyi bobo, mokyisi ete mokule nvene. Kasi b̄eε, konvene pho nali na bomoo emba b̄eε wamoba na bomoo. <sup>20</sup> Mokolo me, wamoeba obokye nga nali onte ya Tata, b̄eε onte ya nga na nga onte ya b̄eε. <sup>21</sup> Moto oli na mibeko ma nga emba kamikumole, yo mona kanzingye. Kasi ookonzingye, Tata amozinga, na nga naamozinga namba na miweninya ne.» <sup>22</sup> Yudasi, kasi Yudasi Mokyeliyota phe, amba wo ne yokye: «Nkolo, ndengye'ye waamiweninya na banga, kasi na mokyisi



phe?» <sup>23</sup> Yesu amba mobuyisa yokye: «Bo moto kanzingye, amokumola maphoo ma nga, emba Tata aamozinga. Tomokye, tomobuya elele ya banga ya izala oka ye. <sup>24</sup> Moto ootonzingye, taakumole maphoo ma nga, nzuka maphoo maokye b̄e, temali ma nga kasi ma Tata owantomaka. <sup>25</sup> Naewolekye maphoo mamana wataaka ba nga na b̄e. <sup>26</sup> Moambelesi, Bolobɔ pha moetomela Tata na nkombo ya nga, amoteya maphoo maso, amoekundolela iso yaa ewolekye nga. <sup>27</sup> Naeyikyele bose, naephe bose pha nga. Siephe phango bokoephe bato ba mokyisi. Mandondo ma b̄e mabee satungisama naa ibaa na boilakye. <sup>28</sup> Waoka obokye nawoko na b̄e ngakye: “Nakyende, namokula ebutolela.” Bokozingye, wamosepela na obokye nakye oka Tata, pho Tata andekyi. <sup>29</sup> Emba unwanwa eye, nawo na b̄e oboo pha maphoo mamana ikyelama pho wamokyelama mango, b̄e oanole. <sup>30</sup> Tata unwanwa eye, esikule wono na b̄e, pho mokonzi nwa mokyisi mumu kaye. Nde phele tali na bokonzi o ikolo sa nga. <sup>31</sup> Kasi pho ya obokye mokyisi moebe obokye nazingye Tata na obokye nakyele iso boko zingye yo. Tem̄e, tomane wawa!»

## 15

### *Yesu ali nwete nwa vinyo nwa phele phele*

<sup>1</sup> «Nga nali nwete nwa vinyo nwa phele phele emba Tata ali nkolo ya inzabi. <sup>2</sup> Bitakyi biso bili onte yanga, bite bibote mbuma, aabimanya, emba bitakye biso bibote mbuma, aabibongya,

pho obokye bikule bota mbuma nzikye. <sup>3</sup> Bèè waunva bongo pho ya iloba saewole nga. <sup>4</sup> Ba na nga booli nga na bèè! Nde bomo booli etakyi, teekokyi ibota mbuma yango mampenzaa boteebe yonyo onte ya ηwete. Nde bomo na bèè tokokyi ibota mbuma, botofee na nga elele yonyo.

<sup>5</sup> Nga, nali ηwete ηwa vinyo, bèè oli bitakyi: Moto okobe na nga na owa oli nga onte ye, yo mona amobota mbuma nzikye, pho tokokyi ikyela ekpele bo nga sibe na bèè. <sup>6</sup> Bo moto tabe na nga elele yonyo, bamovaka o nze ya etakyi, amuunga, emba babiongo, babivaka o ηwenya emba biamolola. <sup>7</sup> Bo obe na nga, na maloba ma nga bo mali na bèè, wamoonga izingyi bèè, wamoizwa. <sup>8</sup> Lowo lophe Tata ngambo, eli obokye bèè obote mbuma nzikye na obokye obutwe baekosi ba nga. <sup>9</sup> Bo wanzinga Tata, na nga naezingye me, ikala na lozingo na nga. <sup>10</sup> Bo kokumole mibeko ma nga, oli na lozingo na nga, ya bookokumole nga mibeko ma Tata, naikale o lozingo le.

<sup>11</sup> Naewosi babona pho nkyisa ya nga ibe na bèè na obokye nkyisa ya bèè iibe nzikye. <sup>12</sup> Eye eli mibeko ηwa nga: Zingana bèè na bèè bo wa ezinga nga. <sup>13</sup> Tewali moto na lozingo loikye ya moto okoambya bomo phe pho ya bebi ne. <sup>14</sup> Bo kokyele ikiyetome nga, bèè oli bebi na nga. <sup>15</sup> Esikule ebanga baombo, pho moombo taebe ikiyikyele nkolo we. Kasi bèè, naebangye bebi, pho iso yaaoka nga oka Tata, naeyimola yango. <sup>16</sup> Teli bèè bato baanzolo, eli nde nga moto owa

eolo na owa ephε etoma pho okyende, obokye obote mbuma na obokye mbuma με ikoko. Pho ya obokye ya moonga bεε oka Tata na nkombo ya nga, amoephε yango. <sup>17</sup> Lowo loeyongye nga, eli obokye ozingane bεε na bεε.»

### *Loino la mokyisi*

<sup>18</sup> «Bo mokyisi moeyini, eba obokye nga ηwanzina phanza. <sup>19</sup> Bo obakyi ba mokyisi, mokyisi nde moezingyi. Kasi bεε toli ba mokyisi: Kasi eli nga oemanye o mokyisi yango mena mokyisi moeyine. <sup>20</sup> Umunya maphoo mawoko nga na bεε obokye: “Moombo talekye nkolo we”, bo wanyoko lo be, bamoenyoko lo na bεε με. Bo bakumola maphoo ma nga, maphoo ma bεε bamakumola με. <sup>21</sup> Kasi bamoekyela iso miina pho ya nkombo ya nga, pho tebaebe owantoma. <sup>22</sup> Bo sikaka ya, na bo sikaka bawole, nde tebabe na isumu, kasi unwanwa eye, tebakokyi angana isumu sa be. <sup>23</sup> Moto ookonzine, kaine na Tata με. <sup>24</sup> Bo sikyelaka bilekyesako bate baika kyela na moto mosuu onte ya be, nde tebabe na isumu. Kasi unwanwa eye oobiweni bεε bali nde iloina, ebe nga ebe Tata. <sup>25</sup> Kasi eli pho ya obokye ekokyisame maphoo maakomama o Mobeko ηwa bεε obokye: “Banzina sa eleko.”

<sup>26</sup> Waamoya Moambelesi owamoetomela nga uta oka Tata, Bolobo pha phele boute na Tata, yo mampenza amoya wo pho ya nga. <sup>27</sup> Na bεε, oli manzoka ma nga, pho tata o etatele oli na nga.»

## 16

<sup>1</sup> «Naewosi maphoo maso mamana pho ya obokye obe sakaa o bimekyi. <sup>2</sup> Bamoewiinya o mangambi ma makyita ma Bayuda. Nzuka imbele siye, moto owa moeboma, amoumunya obokye kambya ikabo oka Nwaphongo. <sup>3</sup> Bamokyela babona pho tebaika eba ebee Tata, ebee nga. <sup>4</sup> Kasi naewole babona pho ya obokye, wamokoka imbele sa be, bee oebe obokye naewolekye lango.»

### *Etoma ya Bolobo*

«Sika ewole lango uta oetatele pho nabaka na bee. <sup>5</sup> Kasi unwanwa eye nakyende oka owantoma, emba na monomo onte ya bee santuna obokye: “Kokye bi?” <sup>6</sup> Kasi pho naewosi lango, mandondo ma bee mabuto na ngongo. <sup>7</sup> Nzuka, naewosi nde phele obokye: Eli bolaa obokye nga nakyende, pho, bo nga sikye, moto ookokyi iya eyambelela etaye. Kasi bo na kye, namoetomela yo. <sup>8</sup> Emba waamoya yo, amoya phe bato ba mokyisi soo pho ya maphoo maakyekyi masumu, bosembo, na isambisa sa Nwaphongo. <sup>9</sup> Pho ya masumu, tebaanzanole. <sup>10</sup> Pho ya bosembo, nakyende oka Tata, otokule nvene. <sup>11</sup> Pho ya isambisa, mokonzi wa mokyisi mumu bamosambisaka. <sup>12</sup> Nakuli ba na maphoo maikye ma iewole, kasi bo naewosi mango unwanwa eye, mamoeleka na bokusi. <sup>13</sup> Waamoya Bolobo bowo maphoo ma phele, amoeteya maphoo maso ma phele. Etawo maphoo maaute ne mampenza. Amowoko maphoo maokye yo, amo eimolaka na maphoo

mamoya. <sup>14</sup> Amoweninya nkyemo ya nga oka bato pho amokpaka maphoo maaute na nga, emba amoeimolaka mango. <sup>15</sup> Maphoo maso mali na Tata, mali na nga. Yango mena, nawo ngakye: Boloobo amokpaka maphoo maaute na nga, emba amoeimolaka mango.»

### *Ngongɔ ya mobutwa nkyisa*

<sup>16</sup> Nwana bokyi bobo, bɛɛ otokule nvenɛ, emba nde nwana bokyi bobo wamokula nvenɛ. <sup>17</sup> Bobɛɛ, baekosi bɛɛ baayoko bamitunaka, bɛkye: «Maphoo mama malukye iwɔ bo? Nwana bokyi bobo, bɛɛ otokule nvenɛ, emba nde nwana bokyi bobo wamokula nvenɛ. Ebe na obokye: “Nakyendɛ oka Tata?”» <sup>18</sup> Maphoo mawo yo, yokye: Nwana bokyi bobo, malukye iwɔ bo? Banga tolomaebe. <sup>19</sup> Yesu aebaka obokye balukye imotuna, amba ya batuna, yokye: «Bɛɛ komitune pho ya maphoo maewosi nga obokye: Nwana bokyi bobo, bɛɛ otokule nvenɛ, emba nde nwana bokyi bobo wamokula nvenɛ? <sup>20</sup> Naewɔɛ nde phɛɛ: Bɛɛ wamolela, wamba na miima, kasi bato ba mokyisi bamoba na nkyisa. Wamoba na ngongɔ, ngongɔ me yamobutwa nkyisa. <sup>21</sup> Yamoba ndokolo nwanwasi kalukye ibota. Waasweya yo, kabe na ngongɔ pho kaebe obokye akomi imbeɛ sa bolosi. Kasi bo aboti, taakule eba bolosi bosɔ baafona pho abuto na nkyisa obokye atokosi moto o mokyisi. <sup>22</sup> Nde bomɔ, unwanwa eye na bɛɛ, obuto na ngongɔ. Kasi namokula ya wenɛɛ na bɛɛ, emba mandondo ma bɛɛ mamobutwa na nkyisa. Moto nono monomo etakokye imanya

nkyisa ya b̄e. <sup>23</sup> Muna mokolo me, otokule ntuna na maphoo. Naewole nde phele: Tata, amoephe iso yamoonga b̄e na nkombo ya nga. <sup>24</sup> Nono unwanwa eye, naino toongyi ekpele yonyo na nkombo ya nga. Oonga, wamozwa, emba nkyisa ya b̄e yaamba lobo.»

*Yesu ali kamba owanyete bobe pha mokyisi*

<sup>25</sup> Naewosi maphoo mamana na bite. Imbele siye, esikule ewole na bite, kasi namoewole saasa maphoo makyekyi Tata. <sup>26</sup> Muna mokolo me, wamoonga Tata maphoo masengyesi na b̄e na nkombo ya nga, teli obokye namonga ne pho ya b̄e. Wamoonga ne b̄e mampenza na noko ya b̄e, <sup>27</sup> pho Tata, yo mampenza kaezingye. Kaezingye pho b̄e konzingye, koanole na obokye nauta na Nwaphongo. <sup>28</sup> Nauta na Tata, naya o mokyisi. Unwanwa eye, naikye mokyisi, nabutwe oka Tata. <sup>29</sup> Baekosi be, bekye: «Oweni, unwanwa eye kowo saasa, tokuli wo na bite. <sup>30</sup> Nde unwanwa eye, banga toebe obokye koebe maphoo maso. Tosengyesi obokye bato bakule etuna mituna. Yango mena, toanole obokye wauta na Nwaphongo.» <sup>31</sup> Yesu amba babuyisa yokye: «Unwanwa eye, b̄e kombe yaanola? <sup>32</sup> Kyeka, imbele me siye, simbo koka, b̄e baso wamunyangwa, moto na moto amobutwa oka ye, wamoika nzika nga mampenza. Kasi sili nga mampenza pho Tata ali na nga elele yonyo. <sup>33</sup> Naewosi maphoo mamana pho b̄e bali na nga elele yonyo obe na motema mpiyo. Wamunyokomo o mokyisi. Kasi

oititalaka, pho inga natokolo kamba owanyete bofe pha mokyisi!»

## 17

### *Yesu kabondela pho ya baeksi be*

<sup>1</sup> Bobele, waawoko yo babona, Yesu atom-baka miyo o ikolo, yokye: «Tata, imbela me simbi ya koka. Weninya obokye nga, Nwana wa we, nali na nkyemo pho ya obokye na nga naweninya nkyemo ya we. <sup>2</sup> Na pho ya obokye, na bokonzi phaamophe we o ikolo sa bato baso, ambya bomoo pha bobele oka bato baso baamophe we. <sup>3</sup> Nzuka bomoo pha bobele boli obokye baeyebe, nde we mampenza owaakolo Nwaphongo, na Yesu Klisto owa toma we. <sup>4</sup> Naweninye nkyemo ya we o munse mumu. Naumboo etoma eyampekye we obokye naekyele. <sup>5</sup> Emba unwanwa eye, Tata, ompe nkyemo phenephe na we, nkyemo yaabaka na nga waabaka nga phenephe na we o boo pha obokye mokyisi mokyelame.»

<sup>6</sup> «Naweninye nkombo ya we oka bato baamanya we o mokyisi pho ya iba mpe. Babaka ba we, wabampe emba bambi kumola iloba sawe. <sup>7</sup> Unwanwa eye baebe obokye iso yaampe we kyiute na we. <sup>8</sup> Obokye maloba maabawole nga eli nde maloba maanvole we. Bamaanola, baeba nde phele obokye naute na we, emba bamba anola obokye we wantoma.»

<sup>9</sup> «Naongye na Nwaphongo pho ya be, sionga na Nwaphongo pho ya mokyisi, kasi pho ya bawa bampe we, pho bali ba we. <sup>10</sup> Emba iso

ili ya nga ili ya we, nde boli iso yaka ya we, ili ya nga, emba nazwe nkyemo ya nga pho ya be. <sup>11</sup> Tata lolu, sikuli ba wa mokyisi mumu, bee baikale o mokyisi, kasi nga nakye oka ya we. Tata mosantu, obabanza na nkombo ya we eyampe we, pho babe moto monomo boli nga na we moto monomo. <sup>12</sup> Waabaka nga na bee elele yonyo, nababanzaka na nkombo ya we eyampe we. Nababanza emba na monomo onte ya bee taikiy bunge, botefe nde njwana owabaka obokye amobunga, pho ya obokye makomi makokyisame. <sup>13</sup> Unwanwa eye, naye oka ya we emba nawo mapho mama o mokyisi pho ya obokye bazwe na mango nkyisa nzikye. <sup>14</sup> Nabaphe iloba sa we, emba mokyisi mobaini, pho tebali ba mokyisi nde bootoli nga wa mokyisi. <sup>15</sup> Siongye na we obokye obamanya o mokyisi, kasi obokye obabanza bee sa kaa o maboko ma Molemba. <sup>16</sup> Bee tebali ba mokyisi nde botoli nga wa mokyisi. <sup>17</sup> Kyela obokye bamiambya muwosi oka ya we na nzela ya mapho ma phele, iloba sa we sili nde phele. <sup>18</sup> Bo wantoma we o mokyisi, na nga nabantome o mokyisi. <sup>19</sup> Pho ya be, namiambya nga mampenza, pho ya obokye na bee bamiambya na nzela ya mapho ma phele.»

<sup>20</sup> «Siongye na Nwaphongo nde pho ya bee na be, nabondete na pho ya baawa, pho ya iloba sa be, bamunzanola: <sup>21</sup> Obokye baso babe moto monomo ndengye eli we Tata, oli onte ya nga emba nga onte ya we. Babe na bee onte ya banga me pho ya obokye mokyisi moanole obokye we



wantoma. <sup>22</sup> Emba nga nabaphe nkyemo eyampe we, pho babe moto monomo boli banga moto monomo, <sup>23</sup> inga onte ya bee booli we onte ya nga, pho ya obokye bakome o sakolo isanga, na babona mokyisi nwamoeba obokye eli we owantoma na obokye wabazinga bo wazinga we.»

<sup>24</sup> «Tata, nazingye obokye elele eli nga, baso baampe we babe na bee wamo me. Emba na bee bawene nkyemo yaampe we, pho wazinga o boo pha ikyelama sa mokyisi. <sup>25</sup> Tata owa bosembo, mena mokyisi temoeyebe, nga nayebe, emba bato baba baebi obokye we wantoma. <sup>26</sup> Nabaimola nkombo ya we, namba kula na baimola yango, pho ya obokye lozingo laanzinga na we lofe na mi be, emba nga onte ya be.»

## 18

### *Iyakyema sa Yesu*

<sup>1</sup> Waawo Yesu babona, amba yakyende yo na baekosi bee o mokukulu moyoko nwa moluka nwa Sedro. Aesi ya nyolo na bee o ibala sonoso sa ndemo. <sup>2</sup> Yudasi, owaamoungya, aebaka ne elele me, pho Yesu na baekosi babaka baya angana wamo. <sup>3</sup> Yudasi aesi ya kpa batuluku ba Baloma na bakyengyesi ba Tempelo, baatomaka bakambi ba banganga na Bafalisayi. Akye na bee o elele me. Baphilaka mphata, na bayanzi, na bakolukolu. <sup>4</sup> Ka Yesu aebaka iso yaamoyelela. Aesi ya susinya oli be, abatuni, yokye: «Bee kolukye nza?» <sup>5</sup> Bekye: «Banga,

tolukye Yesu, moto wa Nazarete». Yesu, yokye: «Nga oyo». Yudasí owamungya atemekye na bée wamɔ. <sup>6</sup> Waawɔ Yesu na be, yokye: «Nga oyo», babuto na munsima, bakaa o se. <sup>7</sup> Yesu akuli batuna, yokye: «Bée kolukye nza?» Bekye: «Tolukye Yesu, moto wa Nazarete». <sup>8</sup> Yesu, yokye: «Nambo ewɔle obokye Nga oyo. Ka, bo eli nga okolukye bée, ole bato bayɔkɔ baba, bakyeɛnde bose.» <sup>9</sup> Yesu awɔ babona phɔ lowɔ, loowɔkyi yo na Ango lolo lokokye: «Sibungye nɔnɔ moto mɔnɔmɔ mi baampe we.» <sup>10</sup> Simo Petelo abaka na mumphata. Aesi ya mokaa, aengyi moombo wa nganga o munene itoo saa boloo. Nkombo ya moombo me, Markus. <sup>11</sup> Kasi Yesu amba wɔ na Petelo, yokye: «Buya muphata nwa we o kokolo. Iwe, kobuya obokye esiwene bolɔsi boompe Tata bobo?»

### *Bakye na Yesu oka Ana*

<sup>12</sup> Bobele, batuluku na mokonzi nwa be, na bakyengyesi ba Bayuda baesi yaakya Yesu, bamobakyi maphanga. <sup>13</sup> Bakye ne phanza oka Ana. Ana alongyaka nwana we wa nwanwasi na Kayafa. Kayafa abaka nganga munene mi mbula me mena. <sup>14</sup> Nzuka eli Kayafa owawɔkɔ na Bayuda lowɔ lolo: «Eli bolaa obokye moto mɔnɔmɔ awe phɔ ya banga bato.»

### *Petelo aanga Yesu*

<sup>15</sup> Simo Petelo na moekosi mosuu bakyeɛkye mibenga Yesu. Moekosi omosuu mɔna, aebanaka na nganga munene. Yango mena, amba ya nyɔlɔ molɔngɔ mɔnɔmɔ na baanyɔlɔkɔ

na Yesu, o ifala oka nganga munene. <sup>16</sup> Petelo aikalaka o ibanda, phenephe na mozibo. Moekosi owaebanaka na nganga munene, aesi ya tokolo, awoo na nwanwasi owabaka kakyengyele mozibo. Bobele, moekosi me aesi ya nyosa Petelo. <sup>17</sup> Nwanwasi me amba ya wo na Petelo, yokye: «Na we, toli moekosi wa moto mona?» Petelo, yokye: «Phe, sili moekosi nwe». <sup>18</sup> Baombo na bakyingyesi bakyelaka nwenya obokye baoto pho mpiyo yakyelaka. Petelo ne ayakaka ya teme na be, kaoto nwenya.

### *Yesu o boo pha nganga munene*

<sup>19</sup> Bobele, nganga munene aesi ya tuna Yesu pho ya baekosi bee na pho ya mateya maateyaka yo. <sup>20</sup> Yesu, yokye: «Nawoko o pha, pho ya moto munsu. Nateyaka o mangambi ma makyita, na o Tempelo, elele ekyeangane Bayuda basu. Sikaka wo mi ibombo. <sup>21</sup> Pho ya'ye kontune? Tuna baanzokaka, baeimole maphoo maabawolekye nga. Baebe yaawoko nga na bolaa.» <sup>22</sup> Wabuya Yesu babona, monomo na bakyingyesi, owabaka phenephe ne, aesi ya mowanda engyete, yokye: «Mena bo kobuyisa we nganga o munene?» <sup>23</sup> Yesu, yokye: «Bo nawo na boke, onzimole, ka bo na wo na bola, iwe konvande pho ya'ye?» <sup>24</sup> Bobele, Ana amba ya motoma, nde na mana maphanga oka Kayafa, nganga munene.

### *Petelo akuli angana Yesu*

<sup>25</sup> Simo Petelo ataka ba atemi, kaoto nwenya. Baesi ya motuna, bekye: «Na we, toli moekosi wa moto me?» Petelo aanga, yokye: «Phe, sili

moekosi we?» <sup>26</sup> Μονομο na baombo ba nganga o munene, owabaka ηwana nyango na moto owaenyekye Petelo itoo, amba wo ne, yokye: «Siikaka ewene na we na nee o ibala?» <sup>27</sup> Petelo akuli angana. Sa koko, soo yamba ya tongo.

### *Yesu o boo pha Moangyesi Pilata*

<sup>28</sup> Na munkukutu, baesi ya mana na Yesu oka Kayafa. Bakye ne oka Pilata. Kasi bakambi ba Bayuda tebaikaka nyolo o ingambi se, obokye bee saoto ekyila ya bee pho baze eyenga ya Ilekana. <sup>29</sup> Yango mena, Pilata akyekye batuna o ibanda, yokye: «Lowo iye loosongyele bee moto oyo?» <sup>30</sup> Bekye: «Bo tabakyi moto mofe, nde toloyakakyi ya eyikyela yo.» <sup>31</sup> Pilata, yokye: «Kasi bee omokpe, omotenele bolombe, bookowo mofeko ηwa bee.» Bayuda bamba ya mobuyisa bekye: «Banga mampenza tolokokyi iphe moto etumbu ya iwa.» <sup>32</sup> Lowo lolo lokokyee ewole ya Yesu, eyawoko yo pho ya iteya ndengye ya iwa sa mowa yo.

<sup>33</sup> Bobele, Pilata amba ya nyolo o ingambi. Abangyi Yesu, amba wo ne yokye: «Iwe, oli mokonzi ηwa Bayuda?» <sup>34</sup> Yesu amba ya mobuyisa yokye: «Kowo babona pho umunye we mampenza, ndee basuu baeimosi pho ya nga?» <sup>35</sup> Pilata, yokye: «Ombuye Moyuda ndee bo? Bato ba mokyisi ηwa we mampenza, banganga banene baeyambye oka nga! Okyesi lowo iye?» <sup>36</sup> Yesu amba buya yokye: «Bokonzi pha nga teboli pha mokyisi mumu. Bo bokonzi pha nga bobobakyi pha mokyisi mumu, baaka nga nde banwanesi ebasi pho nga sa kaa o maboko ma

Bayuda. Kasi bokonzi pha nga, unwanwa eye, teboli pha wawa.» <sup>37</sup> Pilata amba wo ne yokye: «Oli nde mokonzi?» Yesu amba mobuyisa yokye: «Ewo nde we obokye nali mokonzi. Nabotama emba naya o mokyisi pho ya iya imola maphoo maa phele. Moto munso oli na maphoo maa phele kaokye hwesi hwa nga.» <sup>38</sup> Pilata amba ya wo ne yokye: «Maphoo ma phele eli iye?»

### *Pilata ambye Yesu obokye bamobome*

Waatuna Pilata babona, amba kula kyende benga Bayuda o nze, amba wo na bee yokye: «Pho ya nga, sikyi mozwa na na lowoo lonolo loobe. <sup>39</sup> Kasi bo wamele bee obokye mbula na mbula naekandolele moto wa boloko monomo pho abutwe oka ye, imbele size bee eyenga ya ilekana, kozingye obokye naekandolele mokonzi hwa Bayuda?» <sup>40</sup> Bamba ya butwa iyanwana bekye: «Mona phe, nde Balaba!» Nzuka Balaba me abaka mboni na moibi.

## 19

<sup>1</sup> Bobele, Pilata amba ya na Yesu obokye bamobinde phimbo. <sup>2</sup> Batuluku, bamba ya tonga eboko, ekyelate bakonzi, na milo. Bamba na molasa yango o moto. Bamba kula na molasa munkoto hwa mangola <sup>3</sup> Bamba ya susinya phenephe ne bambe wo bekye: «We mona, mokonzi hwa Bayuda!» Bamba butwa na imowanda bingyete. <sup>4</sup> Pilata amba kula tokolo o ibanda, amba ya wo na Bayuda yokye: «Kyeka, naetokolele yo o ibanda, ombe eba obokye sikyi zwa nono lowoo lonolo loobe oka ye.» <sup>5</sup> Yesu

amba ya tɔkɔlɔ o ibanda, alati eboko ekyelate bakonzi etongyi bée na milɔ na munkoto n̄wa mangola. Pilataa amba ya wɔ na bée yokye: «Kyeka moto mɛ!» <sup>6</sup> Kasi waamowɛnɛ banganga banɛnɛ na bato ba bée bamba butwa iyan̄wana bɛkye: «Omobakye o ekulusu! Omobakye o ekulusu!» Pilata amba wɔ na bée yoye: «Omokpe, omobakye o ekulusu bée mampenza, phɔ ya nga, sikyi mozwa nɔnɔ na lowɔ loobe.»

<sup>7</sup> Bayuda bamba mobuyisa bɛkye: «Toli na mobeko mɔnɔmɔ, emba phɔ ya mobeko mɛ, asengyesi iwa phɔ amibuye Nwana wa Nwaphongo!» <sup>8</sup> Waoka Pilata babona, akulaka ila na boikye. <sup>9</sup> Amba kula nyɔlɔ o ingambi, amba ya tuna Yesu, yokye: «Iwɛ, oli wa bi?» Kasi Yesu taika mobuyisa nɔnɔ eyano. <sup>10</sup> Bobɛɛ, Pilata amba ya wɔ nɛ yokye: «Kolɛ iwɔɛ nga! Toebe obokye nali na bokonzi na pha iekandola na pha iebaka oekulusu?» <sup>11</sup> Kasi Yesu amba mobuyisa yokye: «Tokokakyi ifa na bokonzi mi nga bo tephautaka o ikolo, emba yango mɛna oonzambye oka ya wɛ, ali na isumu sinɛnɛ.»

<sup>12</sup> Waoka Pilata babona, alukaka malondo ma ibikya Yesu. Bayuda baesi ya an̄wana, bɛkye: «Bo obikye moto mona, toli nwebi na Moangyesi munɛnɛ, Kaisala.» Moto okomibuya mokonzi na ndengye yɛ mampenza, mɛna owa ilanga na Kaisala. <sup>13</sup> Bobɛɛ, Pilata aesi ya tɔkɔlɔ Yesu o ibanda. Yo akyɛ zala o elele ekyebangye bée Mokpengba n̄wa Mabanga phɔ ya itena bolombe. O munɔkɔ n̄wa Bayuda, elele mɛ, baebangye Gabata. <sup>14</sup> Yabaka mokɔlɔ mɔnɔmɔ obo pha

eyenga ya ilekana, imbele sikome bunya i moto. Pilata aesi ya wo na Bayuda, yokye: «Kyeka, mokonzi nwa be!» <sup>15</sup> Baesi ya anwana, bekye: «Awe! Awe! Omoingya o ekulusu!» Pilata, yokye: «Naingya mokonzi nwa bee o ekulusu?» Bakambi ba banganga, bekye: «Banga, tololi na mokonzi mosuu, toebe nde Kaisala, suka.» <sup>16</sup> Bobele, Pilata amba ya ambya Yesu obokye bamoingya o ekulusu.

### *Baingye Yesu o ekulusu*

Unwanwa eye, bakuli yaakya Yesu. <sup>17</sup> Yesu aesi ya nyanya ekulusu yo mampenza, aikyi mokyisi mamuna, nono o elele ekye bangye be: «Engyengyele ya moto», o munoko nwa Bayuda, bekye: «Gologota.» <sup>18</sup> Wamwo, baesi ya ingya Yesu o ekulusu. Baingye na bato basuu babale o bikulusu, ona bi boloo, ona bi bowee, Yesu waa nte.

<sup>19</sup> Pilata aesi ya wo obokye bakome mokanda, bamobakye o ikolo sa ekulusu ya Yesu. Mokanda me mowwo bobo: «Yesu, moto wa Nazarete, mokonzi nwa Bayuda.» <sup>20</sup> Bayuda baikye batangaka mokanda me, pho elele eya ingyaka bee Yesu o ekulusu, yabaka phenephe na mokyisi. Bakomaka mokanda me na noko iyato iye: Munoko nwa Babele, nwa Baloma, nwa Baela. <sup>21</sup> Bobele, bakambi ba banganga bakye wo na Pilata, bekye: «Manya bookomi we wekye: “Mokonzi nwa Bayuda”, kasi buya obokye: “Moto me awoo yokye: Nali mokonzi nwa Bayuda.”» <sup>22</sup> Pilata, yokye: «Boumbo nga koma, waikale nde bookomi nga.»

<sup>23</sup> Waingya batuluku Yesu o ekulusu, batuluku me baesi ya kpa bitobu be, babikabi na maalo mane, tuluku na tuluku na se iyalo. Bakpe na munkoto nwe, nwaabaka sa bobambele, bamotonga botongyi tata o ikolo nono o se.

<sup>24</sup> Bekye: «Banga sa mokakola. Toma zekye, moto owamoza, kamokpe.» Eli nde bomo pho lowo, laakoma bee o buku pha Nwaphongo lolo, lokokye:

«Bakabi bitobu banga onte ya be, bamaalesi munkoto nwa nga zekye.»

Batuluku me bakyelaka nde bomo. <sup>25</sup> Maliya, nyango wa Yesu, yo na nwana nyango wa nwanwasi, na Maliya nwanwasi wa Keleopasi, na Maliya owa Magadala, batemekye bee baso phenephe na ekulusu eyaka Yesu. <sup>26</sup> Waawene Yesu nyango, na moekosi owaloboko yo zinga, atemi phenephe na nyango, aesi ya wo na nyango, yokye: «Mama, mena eli nwana wa we». <sup>27</sup> Awo na moekosi me, yokye: «Mena eli nyongo. Nde sina imbele me, moekosi me aesi ya kpa nyango o ingambi se.»

### *Iwa sa Yesu*

<sup>28</sup> Sima ya maphoo mamana, bo waebaka Yesu obokye etoma ye yumbo, aesi ya wa, pho ya ikokya maphoo maakoma bee o buku, yokye: «Naokyi phowa ya maa.» <sup>29</sup> Kpala yonyo yabaka wamo, yatondaka na maleku ma ngaa. Baesi ya kpa inyuka, basinyinye o maleku me, basiphakye i nwana nwete, basiongyise Yesu o munoko. <sup>30</sup> Waanyunya yo maleku me, yokye: «Etoma ya nga yumbo.»



Amba ya nyokya moto, asengoo.

*Bamaa Yesu ikongo o mobanzi*

<sup>31</sup> Yabaka nkolo ya mosala itano, bakambi ba Bayuda tebaikaka zinga obokye bato baikale o ekulusu nongo mokolo moeme be. Mokolo me nywabaka na ntina enene pho nywalongobanaka na eyenga ya Ilekana. Bobele, baesi yaakye we na Pilata obokye batene bato me mpee ya makolo, bambe bamanya. <sup>32</sup> Pilata aesi ya toma batuluku, bakye tena mpee ya makolo ma bato babale, baaingyaka bee na Yesu molongo o bikulusu. <sup>33</sup> Wakoma bee oka Yesu, bawenekye obokye ambo wa. Yango mena, tebaika motena mpee yaa makolo. <sup>34</sup> Monomo na batuluku aesi ya mumaa ikongo o mobanzi. Bobele, na malongo na maa maesi ya tokolo. <sup>35</sup> Moto okoeimole maphoo mamana, amawenekye, maphoo me mali phele. Amaimolaka obokye na be, oanole me. Kaebe obokye kawo phele. <sup>36</sup> Lowo lalona lalekanaka pho lowoo laakoma bee o Buku pha Nywaphongo lolo, lokokye: «Ete baamotene nongo mumppee monomo.» <sup>37</sup> Lowo loyoko laakoma bee lokule wo obokye: «Bamokyeka yo uumbo bee maa.»

*Bakundi Yesu*

<sup>38</sup> Unwanwa eye, moto monomo na nkombo Zozefu, aesi ya onga Pilata, obokye akpe ndemba ya Yesu. Zozefu, mokyisi nwe Alimataya, abaka moekosi wa Yesu. Taikaka miebinya pho abaka kaile Bayuda. Pilata aesi ya anola. Bobele, Zozefu aesi ya kye kpa ndemba ya Yesu. <sup>39</sup> Nikodem, owakyekye phanza oka Yesu

waamokolo mamuna, abaka ne, yo na Zozefu. Bobele, aesi na ne yaakyela bée na phoo na makyikyí ma ηwete. Yabaka na bozito pha bakilo mako maato. <sup>40</sup> Baesi ya kpa ndemba ya Yesu, bée baso babale. Baezingyi na bitato, bakyesi na mee me o motema. Mena eli bo wamelekuye Bayuda ikunda bato. <sup>41</sup> O elele eyaingyaka bée Yesu, ibala sonoso sa ndemo sabaka wamo. O motema ηwa ibala me, mooto monomo monyakune ηwabaka omo, naino tebamokundi moto. <sup>42</sup> Yabaka mokolo monomo obo pha mokolo moeme Bayuda. Yango mena, bamba ya kunda Yesu, pho ilita me sabaka phenephe.

## 20

### *Mooto moikasi pha*

<sup>1</sup> Mokolo ηwa eyenga, waa moyelo, Maliya Magadala aesi ya kye o mooto. Waakoma yo omo, aweni bamanye ibanga saazibaka bée o munoko ηwa mooto. <sup>2</sup> Bobele, aesi ya kyilingana, akuye zwa Simo Petelo na moekosi oyoko, owabaka Yesu kazingye. Aesi ya wo na be, yokye: «Bakuye manya Nkolo o mooto, toloebi mbale ekye bée molangya.» <sup>3</sup> Petelo na moekosi me mona, baesi ya mana, bakuye o mooto. <sup>4</sup> Baesi ya kyilingana, bée baso babale. Ka moekosi me mona alekyi Petelo na mbango, akuye koma o mooto, moto owa obo. <sup>5</sup> Aesi ya nongyemele, aweni bitato ba malekani bilangyi o se, nzuka yo taikaka nyolo omo. <sup>6</sup> Emba Simo Petelo owamobengaka o sima, ne aesi ya koma. Aesi ya nyolo o mooto

aweni ne bitato ba malekani biilangyi o se, <sup>7</sup> Na malekani maamozingaka bée o moto. Malekani me mazingami, malangyi mbale, bitato na bango mbale. <sup>8</sup> Bobele, moekosi me owakomaka o mooto moto owa obo, ne aesi ya nyolo omo. Aweni nde bomo, amba yaanola obokye Yesu akundoo. <sup>9</sup> Nabo babona, baekosi tebataa kaebe makomi maawo obokye Yesu amokula kundwa onte ya bawe. <sup>10</sup> Emba baekosi me babale baabana bamba ya butwa oka be.

### *Yesu atokolesi Maliya Magadala*

<sup>11</sup> Imbele me, Maliya atemekye i mbale ya mooto, kalele. Wabaka yo kalele, aesi ya nongyemele o mooto. <sup>12</sup> Aweni baanze babale, balati bitobu ba mpembe, bazasi waalangyaka bée ndemba ya Yesu, ona bi moto, ona bi makolo. <sup>13</sup> Baanze me baesi ya motuna, bekye: «Mama, kolele iye?» Yokye: «Nalele pho bamanye Nkolo ya nga o mooto. Siebi na mbale ewaa ekye bée molangya.» <sup>14</sup> Waabaka yo kawo babona, bobuyakye miyo o sima, aweni Yesu, atemi. Ka yo taikaka eba obokye mena Yesu. <sup>15</sup> Yesu aesi ya motuna, yokye: «Mama, kolele iye? Kolukye nza?» Maliya abuyaka obokye kyewo ne nde moto okokyele etoma o ibala me saabaka mooto. Maliya, yokye: «Tata, bo we moto oomumanye, ontaya mbale ekye we molangya, Nakye mokpa.» <sup>16</sup> Yesu, yokye: «Maliya!» Maliya aesi ya buya miyo mbale eli Yesu. Aesi ya wo ne na munoko nwa Baebele, yo kye: Raboni! Kyewo obokye «Moteye». <sup>17</sup> Yesu aesi ya wo ne, yokye: «Sa mpila pho nali sataa kyende oka Tata. Kasi, okye

imola ðebi na nga obokye nga Yesu, nabutwe oka Tata Nwaphongo, ne ooli Ango wa ðe, na Nwaphongo wa ðe.» <sup>18</sup> Bobele, Maliya Magadala, aesi ya kye, akye imola ðaekosi yokye: «Naweni Nkolo!» Amba na ðaimola na maphoo mawoko Yesu ne.

### *Yesu atokolesi ðaekosi*

<sup>19</sup> Mokolo me ñwa eyenga, wa nkankolo, ðaekosi ðaanganaka o ingambi sonoso ðazibi bizifele, pho ðailaka Bayuda. Yesu aesi ya phunzwa, atemi onte ya ðe, yokye: «Bose ðoðee na ðe!» <sup>20</sup> Waunva yo iwo ðabona, aesi ya teya ðaekosi matandala me na mobanzi nwe. Wawenekye ðee Yesu, ðabutwaka isamba. <sup>21</sup> Yesu amba kula ya ðawole, yokye: «Bose ðoðee na ðe! Na nga naetome o mokyisi, ðo wantoma Tata.» <sup>22</sup> Sima, amba ya ðaulela muwe, yokye: «Naephe Bolobo Bosantu! <sup>23</sup> Bo olimbise moto na ðobe ðokeyesi yo, Nwaphongo ne aamolimbisa. Bo tolimbise moto na ðobe ðokeyesi yo, Nwaphongo ne etamolimbisa.»

### *Toma aanosi obokye Yesu ali Nwaphongo*

<sup>24</sup> Nzuka, wabatokolelekye Yesu, monomo na ðaekosi, na nkombo Toma okobangye ðee Nwana owa Zaa tabaka na ðee wamo. <sup>25</sup> Bobele, ðebi ne, ðaekosi, ðaesi ya wo ne, ðekye: «Toweni Nkolo». Kasi yo, yokye: «Bo siweni biusa bia ðasete o matandala me, sibilitase na nwee, na ðo sitase uusa eya mobanzi nwe na itandala sa nga, esianole.» <sup>26</sup> Sima ya poso yonyo, ðaekosi ðakulaka angana o ingambi, Toma ne aþaka na ðee wamo. Bazibi bizifele, kasi Yesu akuli kye

batokolele. Atesi onte ya be. Yokye: «Bose bobee na be!» <sup>27</sup> Yesu amba ya wo na Toma, yokye: «Elola nwe nwa we oni, okyeye matandala ma nga, osusinya na itandala sa we, otasa mobanzi nwa nga. La kula ika ziiko, anola nde to!» <sup>28</sup> Toma, yokye: «Nkolo ya nga na Nwaphongo wa nga!» <sup>29</sup> Yesu, yokye: «Oanosi pho oonveni we? Bato baanzanole, mena sataa nvene, bee bali bato ba nkyisa!»

### *Pho ya'ye bakoma buku bobo*

<sup>30</sup> Yesu akulaka kyela bilekyesako bisuu biikye o miyo ma baekosi be, biitebaika koma bee o Buku bobo. <sup>31</sup> Kasi maphoo maakoma be, bamakoma pho bee oanole obokye Yesu ali Masiya, Nwana wa Nwaphongo, na obokye, okomoanole, azwe bomoo.

## 21

### *Yesu atokolesi baekosi o Galileya*

<sup>1</sup> Sima ya nkolo, Yesu akulaka kye tokolele baekosi bee o mokukulu nwa maa ma Tiberiade. Yabaka bobo: <sup>2</sup> Simo Petelo, na Toma okobangye be, Nwana awa Zaa, na Natanaele moto wa mokyisi nwa Kana o Galileya, na bana ba bampele ba Zebede, na baekosi baayoko babale ba Yesu, babaka na be. <sup>3</sup> Simo Petelo aesi ya wo na bebi ne, yokye: «Nakye lobo.» Be, bekye: «Na banga, tokye na we.» Bobele, baesi ya kye, bakye kpela o vato, babuto ikye miolo. Basi mokolo mokolo, sa zwa ekpele. <sup>4</sup> Waa limbi limbi, Yesu aesi ya teme o mokukulu nwa maa. Mena baekosi sa eba obokye eli yo.

<sup>5</sup> Yesu aesi ya wɔ na βε, yokye: «Banzenga, ozwe ηwana ekpele?» Βεε, βεkye: «Phe» <sup>6</sup> Iyo, yokye: «Vaka bondendi mbale ya vato eya boloo, wamozwa.» Βοβελε, βαesi ya βοvaka mbale με. Tebakulaka koka ibenda bondendi phɔ phatondaka na swe βοβο νονο owo. <sup>7</sup> Moekosi owabaka Yesu kazingye, aesi ya wɔ na Petelo, yokye: «Mena, eli Nkolo», Petelo amanyaka etobu phɔ ya ivaka bondendi. Waoka yo obokye mena eli Nkolo, aesi ya lata etobu με. Amba ya mivaka o maa. <sup>8</sup> Βεbi νε βαesi ya kye na bona vato. Babuto iongo bondendi με, botondi na swe. Baikalaka na mokukulu phenephε matambe munkama. <sup>9</sup> Waabwa βέε o mokukulu, βαesi ya wενε ηwenya wamɔ, batumbi swe i ηwango, na mapa malangyi. <sup>10</sup> Yesu aesi ya wɔ na βε, yokye: «Yaka na swe mii zwe βε.» <sup>11</sup> Simo Petelo aesi ya kye kpela o vato. Aesi ya abola bondendi, botondi na swe inενε na iinενε, munkama mɔnɔmɔ mbuka makoo matano na iyato. Na βο watondaka bondendi με na swe nzikye βαβona, tephaikaka kakwa. <sup>12</sup> Yesu, yokye: «Βεε, yaka, ya ze.» Moekosi νονο mɔnɔmɔ taikaka meka imotuna obokye: «Iwe oli nza?» Phɔ βαεbaka obokye eli yo Nkolo! <sup>13</sup> Βοβελε, Yesu aesi ya susinya waali βε. Abuto ibakabela mapa με mamana na swe με mena. <sup>14</sup> Eye, eli mbala eya iyato eyakulaka Yesu tokolele βαekosi βε, wakundwa yo.

*Yesu atuni Petelo mbala iyato*

<sup>15</sup> Waumva βέε iza, Yesu amba ya tuna Simo Petelo, yokye: «Simo, ηwana wa Yoane, oli

nwebi na nga ileka bebi baba?» Iyo, yokye: «Nkolo, koebe obokye nali ekamba ya we.» Yesu, yokye: «Obanzakye bana ba mampate ma nga.»<sup>16</sup> Akuli motuna mbala eya ibale, yokye: «Simo, njwana wa Yoane, oli nwebi na nga?» Iyo, yokye: «Iyo, Nkolo, koebe obokye nali ekamba ya we.» Yesu, yokye: «Obanzakye mampate ma nga.»<sup>17</sup> Akuli ya motuna mbala eya iyato, yokye: «Simo, njwana wa Yoane, oli ekamba ya nga?» Waamotuna Yesu mbala eya iyato, obokye oli ekamba ya nga, Petelo amiokaka ngongo. Amba ya mobuyisa, yokye: «Nkolo, koebe pho iso, koebe obokye nali ekamba ya we!» Yesu, yokye: «Obanzakye mampate ma nga.»<sup>18</sup> Naewole nde phele: Wabaka we nweygye, we mampenza wabaka komilasa mokaba, wakyekye mbale eso ezingyi we. Kasi wamobutwa we munanga, wamotandola maboko ma we, emba moto mosuu amoelasa mokaba. Emba amokye na we mbale ewaa, eteyiky i we zinga.»<sup>19</sup> Awoko maphoo mamana obokye aimole bo wamowa Petelo, na bo wamoweninya yo nkyemo ya Nwaphongo. Bobele, Yesu, yokye: «Imbengye!»

*Yesu awo pho ya moekosi owabaka yo kazingye*

<sup>20</sup> Petelo aesi ya buya miyo o sima, aweni moekosi, owabaka Yesu kazingye, kaya babenga. Eli yo moekosi owakoloko na Yesu mi itoo, wazaka be, yokye: «Nkolo, moto me, owamoeyungya, nza?»<sup>21</sup> Bobele, Petelo waamowene yo, aesi ya tuna Yesu, yokye: «Ka yo, Nkolo, lowoo iye laamokomela?»<sup>22</sup> Yesu,

yokye: «Bo nazingyi obokye ataa ba o mokyisi nɔnɔ mokɔlɔ mowaa, ηwamoya nga, lowɔ me lokyekyi we? Kasi we, imbengye!» <sup>23</sup> Bobele, Simo yeesi ya nyangwa onte ya βebi obokye moekosi me mɔna, etawe. Nzuka Yesu taikaka wɔ na Petelo bomɔ babona. Awɔkɔ nde ne, yokye: «Bo nazingyi obokye aβe o mokyisi nɔnɔ mokɔlɔ mowaa ηwamoya nga, lowɔ me lokyekyi we?»

<sup>24</sup> Eli moekosi me mɔna, ooloimosi maphɔɔ me mamana. Amakoma o Buku boβo. Toeβe na obokye maphɔɔ, maaloimosi yo mali phele.

### *Lowɔ la mbomela*

<sup>25</sup> Yesu akulaka kyela maphɔɔ masuu maikye. Bobamakomaka lowɔɔ lonɔlɔ na lonɔlɔ o Buku, naumunya obokye mokyisi mobimba nde te mokokakyi phɔ ya ifomba babuku βaunvaka βée koma.



## **Sangola Eenyakune**

### **Lobala: Sangola Eenyakune New Testament**

copyright © 2018 Wycliffe Bible Translators, Inc.

Language: (Lobala)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source files dated 29 Jan 2022

45dc5a8e-f513-5ba3-aad6-e48bd1d5b563